

# *KARONG ADLAWA KINING*

## *KASULATAN NATUMAN*



Magpabilin lang usa sa pagtindog, kung mahimo, samtang ginaduko nato ang atong mga ulo alang sa pag-ampo.

<sup>2</sup> Minahal nga Langitnong Amahan, mapasalamaton kami karong gabhiona alang niining, usa na usab ka kahigayonan nga makaanhi ug maipahayag kining mahimayaon, og kahibulongang Ebanghelyo ni Jesus Cristo. Ginapasalamaton Ka namo tungod kay Siya sa gihapon nagpabilin nga mao sa gihapon kagahapon, karon, ug hangtud sa kahangturan. Ginapasalamaton Ka namo tungod niining mga tawo nga nagkatigum dinhi sa niining mabugnaw nga panahon, ug bisan pa niana hilahiban gihapon ang ilang pagpaabot, nga nagalaum, nagatoo nga may talagsaong butang nga igahatag ang Dios nganhi kanamo. Nagatambong kami nga aduna niana nga paglaum, Ginoo, sa matag panagtigum. Ginapasalamaton Ka namo alang sa mga panerbisyo, niadtong miaging gabii, sa tabernakulo; ginapasalamaton Ka alang sa panerbisyo dinhi kagabii, ug alang sa panerbisyo niining adlaw, sa tabernakulo. Nagalaum kami karon sa kung unsa man ang Imong giandam para kanamo karong gabhiona.

<sup>3</sup> Amahan, nasayod kami nga mapalihok ni kinsa ang ilang mga kamot nga mapakli nila ang mga panid sa Biblia, apan aduna lamang og Usa Nga makapahimong buhi Niini ug tinuod sa Pulong, ug Ikaw kana. Ug, Amahan, nagalaum kami nga buhaton Mo kana karong gabhiona. Panalangini kami sa tanang paagi. Ang among mga kasingkasing puno gayud sa kalipay ingon nga among nakita nga nagakahaduol na ang panahon sa diha nga mahinagbo na namo Siya, sa nawong og nawong, ang Maong among gihigugma ug ang tumong sa among pagkinabuhi sulod niining daghang mga katuigan.

<sup>4</sup> Daghang mga bag-ong kinabig, Ginoo, ang nangakabig. Sa hingsayran ko nga daghang mga tawo, kuwarenta o singkwenta, ang pagabautismohan sa Imong Ngalan, inig ka buntag, gikan sa panerbisyo kagabii. Oh Dios, kung mahimo ipapadayon kana, ginaampo namo, hangtud nga makita sa matag predestinado nga Binhi sa Dios ang Kahayag sa Ebanghelyo, ug makasulod na sa panon.

<sup>5</sup> Ginapangamuyo namo nga Imo kaming itago karong gabhiona luyo sa Pulong; butahi kami sa mga butang nga iya sa kalibutan, ug itugot nga makita namo si Jesus. Hinaut nga magkaaduna og usa ka kasinatian nga sama kaniadto sa

Bukid sa Pagkausab sa Dagway sa among taliwala, niining gabhiona, nga walay si kinsa man ang among makita kondili si Jesus lamang. Ginapangamuyo namo kini sa Iyang Ngalan, ug alang sa Iyang kahimayaan ug sa kapanghimatuoran sa Iyang Ebanghelyo. Amen.

Mahimo na kamong manglingkod.

<sup>6</sup> Ibiyo ko lang kining mikropono, o kining lamesa, nga medyo patakilid, kung okey lang, aron nga akong makita ang parehong bahin sa mga mananambong. Sa hunahuna ko basin og mahimo ko rang mapahimutang kining mga mikropono dinhing dapita. Sige, kadali lang.

<sup>7</sup> Ginapangumosta nato, gikan dinhi sa pinaka-punoang bahin sa awditoryum niining gabhiona, ang atong mga higala sa Arizona, California, Texas, ug sa tibuok Estados Unidos, pinaagi sa telepono. Kini, ginapasibya kini sa tibuok nasud, kining panerbisyo niining gabhiona, pinaagi sa telepono, busa nagasalig kita nga panalanginan kita sa Dios.

<sup>8</sup> Madungog ba ninyo, dinha sa luyo sa—sa awditoryum diha sa wala? Okey, susihon na nila karon ang linya sa telepono, aron hibaloon kung okey ba gyud kini.

<sup>9</sup> Malipayon ba ang tanan karong gabhiona? [Nagaingon ang kongregasyon, “Amen.”—Ed.] Aba, maayo kana! Sa niini nga bahin? [“Amen.”] Amen. Malipayon kaayo ko nga makita kamong tanan nga nakalingkod nga komportable.

<sup>10</sup> Ug bueno ugma sa gabii, kung padayon ang pagdaghan sa mga tawo, mahimo usab silang modirekta na lang sa telepono. Aduna man gihapon karong gabhiona. Sa hunahuna ko atua ang uban kanila didto sa tabernakulo.

<sup>11</sup> Ug, ugma sa buntag, dili mapahigayon ang mga panerbisyo sa tabernakulo, tungod nga...aduna ma’y magbubulak nga magbutang og dekorasyon didto sa simbahan para sa usa ka kasal ugma sa hapon. Ug gibalhin usà nila ang—ang mga panerbisyo, sa buntag, didto sa simbahan ni Igsoong Ruddell, nga usa sa atong mga kaabag, nga didto kini sa—sa highway, 62. Naipahibalo na ba kini? [Nagaingon si Igsoong Neville, “Oo.”—Ed.] Naipahibalo na diay kini. Ug, kung mapuno man gani didto, dalhon namo ang uban pa ug paadtoon ang usa pa ka ministro didto sa simbahan ni Igsoong Junior Jackson, didto sa Clarksville. Ang hinungdan nga amo kining gibalhin didto kang Igsoong Ruddell, tungod nga duol ra man gud siya dinhi, ug mahimo ra natong. . . ug nahunahuna namo nga mas dali ra ninyong makita kana. Ug dayon kami na ang bahala niana sa unsa man nga pamaagi. Ug siguradohon namo nga mapahigayon gyud ang tanang mga pagbautismo ugma, ug nagalaum ko nga aduna unta og usa pa o duha ka gatus nga madugang niadtong mga bautismohan ugma. Ug bueno ugma sa gabii. . .

<sup>12</sup> Dili ko gayud unta gustong ipahibalo og sayo ang unsa mang butang nga akong igapamulong, apan usa ka gabii sa panerbisyo, o usa ka adlaw, gusto kong hisgotan ang mahitungod sa hilisgotanan nga: *Kinsa Kining Si Melquisedec?* Tungod kay, kini’y usa—usa man gud ka hilisgotanan nga sa hunahuna ko nagakinabuhi na kita sa panahon sa niining mga kapadayagan, nga dugay na nga pangutana sa tanang mga nangaging kapanahonan, mahitungod sa, “Kinsa ba kini nga Tawo?” Ug nagatoo ko nga ang Dios adunay tubag, kung si Kinsa ba gyud Kini. Ang uban miingon nga kono, “usa ka pagka-sacerdote,” ang uban miingon pud, “usa ka hari,” ang uban . . . Apan kinahanglan adunay . . .

<sup>13</sup> Basta adunay pangutana, aduna gyu’y tubag para nianang pangutana, nga husto lang man. Walay mahimong pangutana kon wala una og tubag.

<sup>14</sup> Karon, nagasalig kita nga hatagan kita og panalangin sa Dios niining gabhiona gikan sa Iyang Pulong, sa dihang magabasa na kita Niini.

<sup>15</sup> Ug aduna kamo’y . . . giingnan ako ni Billy nga sultihan ko kono kamo nga nagkaaduna kamo og maayong pagpakigtimbayayong sa mga tawo dinhi nga nagadumala sa mga parkingan, sa mga kapulisan ug tanan na. Ipadayon n’yo kana; kana’y maayo, gyud kaayo.

<sup>16</sup> Nagalaum kita nga makita ang panahon, tingali’g dili na madugay, sa diha nga mahimo na natong madala ang tolda dinhi sa siyudad ug ipahimutang kini dinhi sa may dulaanan-sa-baseball, kon diin makapabilin kita sa hataas nga panahon, siguro sulod sa tulo o upat ka semana, nga rebaybal, nga sunod-sunod. Ug dinhi man gud dili pa gani nato halos naila ang usa’g usa, ug dayon kinahanglan na natong manamilit ug mobiya na usab. Apan gusto kong moanhi ug magpabilin usà sa taas-taas nga pagbisita, sa usa ka higayon kon diin mahimo ra ninyong magpabilin aron dili na nato kinahanglan nga magtapos gyud sa usa o duha ra ka gabii, kondili magpabilin lang ug magtudlo, adlaw ug gabii, adlaw ug gabii, sa walay paghunong. Siguro adunay mopauli ug pakaonon ang mga manok, gatasan ang mga baka, ug mobalik ra pagkasunod semana ug magpadayon sa buluhaton. Ako—gusto ko kana. Busa ang Ginoo magauban kaninyo.

<sup>17</sup> Bueno, sa dili pa ako mogikan, tingali sa Dominggo sa buntag o Dominggo sa gabii, o kaha sa ubang adlaw, usa sa niining mga panerbisyo, nasayod ko nga nanaghulat gyud kamong tanan nga madungog ang Mensahe sa Kamatuoran mahitungod sa *Kaminyoon Ug Panagbulag*, nga mao’y usa sa mga dagkung problema sa niining panahon. Ug sigurado gyud ako ingon nga nagatindog ako dinhi, nagatoo ko nga ang hustong

tubag anaa sa Pulong sa Dios, ug nagatoo ko nga mao kana'y hinungdan nga nagsaad ako nga mobalik.

<sup>18</sup> Ug sa hunahuna ko, sa nasayran ko, kutob sa akong nahibaloan, gusto kong magpahigayon og usa pa ka panerbisyo dinhi sa Jeffersonville, sa Dominggo sa Pasko sa Pagkabanhaw, ug atong . . . para sa pagsubang sa adlaw nga panerbisyo, ug dayon kana'y sa Dominggo sa Pasko sa Pagkabanhaw. Busa atong ipahibalo nang daan kini ug siguro paningkamotan nga maabangan na ang awditoryum, kung mahimo, o sa kung asa man, para sa Dominggo, siguro sa umaabot nga Sabado ug Dominggo. Kinahanglan kong moanhi dinhi nga magsakay og eroplano ug mobalik sa gilayon, tungod kay hapit-hapit ra kana sa panahon . . . kinahanglan kong tan-awon kana, unà, sa akong eskedyul, ug sa usa sa akong—akong—akong nakaplano na nga mga pagbiyahe sa California. Ug dayon, sa gilayon human niana, kinahanglan kong moadto na pud sa—sa Africa. Busa padayon lang sa pagpakigsayod ug iampo kami.

<sup>19</sup> Bueno, niining gabhiona, gusto kong awhagon ang inyong pagtagad para sa usa ka bahin sa Pulong sa Dios, nga makita diha sa ika-4 nga kapitulo sa San Lucas. Sa ika-4 nga kapitulo ug ang ika-16 nga bersekulo, magsugod kana, nga nagapakigsulti si Jesus.

*. . . Karong adlaw kining Pulong natuman sa inyong mga igdulungog.*

<sup>20</sup> Karon gusto natong maghimo, gikan Niana, og usa ka konklusyon kung unsa ka gamhanan ang Pulong sa Dios! Bueno, nakasabot na kitang tanan sa mekanika, apan kinahanglanon pa man ang Dinamika aron moandar Kini.

<sup>21</sup> Mahimo natong masabtan kung unsa ang mekanika sa usa ka makina, sa sakyanan, apan bisan pa man kinahanglanon pa ang dinamika aron moandar ug motuyok ang mga ligid.

<sup>22</sup> Bueno, mibalik si Jesus kaniadto sa—sa Nazaret, kon diin Siya nagdaku. Sa pagpadayon dinhi sa mga Kasulatan, makita nato nga miingon sila, “Nakabalita kami nga namuhat Ka kono og *ingon niini-ug-ingon niana* didto sa Capernaum. Karon ipakita kanamo nga Imong buhaton kana dinhi sa Kaugalingon Mong siyudad.”

<sup>23</sup> Miingon si Jesus, “Walay usa—usa ka propeta nga walay kadungganan gawas sa iyang kaugalingong lungsod.” Ug, siyempre, dinha man ka nagdaku, ug kon diin nakaila sab ang mga tawo kanimo. Pero didto dili man maayo ang—ang—ang Iyang dungog, sa sugod pa lang, tungod nga nahimugso Siya nga walay usa ka yutan-ong amahan. Gitawag nila Siya nga “usa ka ilehitimo nga bata,” tungod nga si Maria kono mabdos na man sa wala pa siya naikasal, nga pormal, kang Jose. Apan, dili kana ingon niana, nasayod kita nga dili gyud kana ingon niana.

<sup>24</sup> Ug sa niini nga Kasulatan, ang hinungdan nga nakatutok gyud ang akong mata niini, may usa ka butang man gud nga nahitabo bag-ohay pa lang sa Phoenix, Arizona. Ulahing adlaw na kadto, sa buluhaton kon diin nagwali ako sa International Convention sa Full Gospel Business Men.

<sup>25</sup> Ug sa niini nga konbensyon dunay usa ka bisita nga kauban namo, nga usa ka obispong Katoliko, nga—nga miyembro sa “Chaldean Rites of the Apostolic Catholic church; si Most Rev. John S. Stanley, O.S.D.” Siya mao “ang arsobispo sa pinakasentro sa Estados Unidos,” sa iglesiang Katoliko. Nahitabo nga *kini* ang iyang kard ug ang iyang—ug ang igatawag kaniya.

<sup>26</sup> Ug usa siya ka bisita sa Christian Business Men, ug nakita ko siya didto, usa ka adlaw sa wala pa kadto. Ug sa dihang nagwali na ako sa Sabado sa gabii, nagtoo ko nga Sabado gyud kadto, o Sabado sa buntag sa pagpamahaw, ug akong... Samtang nagwali ako, sige siya’g tan-aw kanako. Nakahunahuna ko, “Kanang tawhana sigurado gayud nga wala miuyon sa tanan kong ginasulti.” Ug, kabalo mo, inyong—makita gyud ninyo siya; nagatando-tando ra siya, apan wala ako masayod kung unsa gayud ang nakapalihok kaniya nga ingon niadto.

<sup>27</sup> Busa sa Dominggo sa hapon, sa dihang mitindog na ko aron magwali, og basahon ko na kaniadto ang akong teksto mahitungod sa *Mga Kasakit Sa Pagpanganak*, kon diin miingon si Jesus, nga, “Maingon sa usa ka babaye nga magaanak,” nagaantus siya sa pagpanganak. Ug magwali na ako gikan niadto, sa, *Mga Kasakit Sa Pagpanganak*, ingon nga hilisgotanan, nagawali nga ang kalibutan anaa na gyud karon sa mga kasakit sa pagpanganak. Ang daan kinahanglan nga mawala na, aron nga mahimugso ang bag-o; sama ra usab sa usa—usa ka binhi nga kinahanglan madugta, aron mogitib ang bag-ong kinabuhi.

<sup>28</sup> Ug grabe ang mga kasakit, ang mga kasakit sa pagpanganak mihampak na sa kalibutan! Sa Nahaunang Gubat Pangkalibutan, hilabihan gayud ang iyang pag-antus, tungod kay aduna man sila kaniadto og hilo nga gas, ug uban pa, nga halos mopuo na gayud sa kalibutan. Ug sa Ikaduhang Gubat Pangkalibutan, mihampak kaniya ang usa na usab ka, hilabihan nga pag-antus; aduna sila og dagkung mga bomba, ug bomba atomika usab. Dili na niya maagwanta pa ang laing kasakit sa pagbatî. Tungod niining mga missile ug ingon niining mga butang karong panahona, ang usa pa ka gubat magpabalibag na gyud kaniya ngadto sa kawanangan, kay magaanak na man siya karon. Ug magkaaduna na og usa ka bag-ong yuta. Miingon ang Biblia nga magkaaduna gayud.

<sup>29</sup> Sumala sa Mensahe sa matag propeta, nakasinati pud ang Israel og kasakit sa pagpanganak, tungod kay kining mga propeta nagaabot man sa esena human nga gihimo nang

organisasyon sa mga teologo ug mga ministro ang tibuok iglesia. Ug sa dihang miabot na sa esena ang maong mga propeta nga dala ang MAO KINI ANG GINAINGON SA GINOO, giuyog nila kadtong mga iglesia, ug mao nga nakasinati siya og kasakit sa pagpanganak. Sa katapusan, nagpadayon na ang iyang mga kasakit sa pagpanganak hangtud nga gihimugso niya ang usa ka Anak sa Ebanghelyo, nga mao ang Pulong Mismo nga nahimong unod.

<sup>30</sup> Busa ang iglesia anaa na mismo sa mga kasakit sa pagpanganak karong gabhiona, usab, aron mahimugso na ang Anak, ang Anak sa Dios nga moabot pag-usab. Ang tanan natong mga teologo, ang tanan natong mga sistema, ang tanan natong mga denominasyon, nangadugta na mismo sa ilalum nato. Mao nga anaa na kita sa kasakit sa pagpanganak, ug ang usa ka Mensahe gikan sa Dios kanunay nang nagahatag sa iglesia og hilabihan nga kasakit, apan dili magdugay igaanak na niya ang usa ka Pangasaw-onon. Igaanak niana si Jesus Cristo para sa Iyang Pangasaw-onon.

<sup>31</sup> Ug, dayon, gihunahuna ko kadtong maong tawo ingon nga wala gayud miuyon kanako. Sa dihang mitindog na ko aron igawali kining Mensahe, giablihan ko ang akong Biblia, aron pangitaon ang maong panid.

<sup>32</sup> Ug bag-ohay lang ko gihatagan sa akong asawa niadto og usa ka bag-ong Biblia, para sa Pasko. Ang akong karaan nga Biblia mga kinse anyos na, ug mao nga halos nawatas-watas na. Ang mga panid, sa matag higayon nga buklaron ko kadto, nagakagisi. Ug, bisan pa niana nasayod na man ko kon diin makaplagan ang matag Kasulatan, busa didto ko nga Biblia nagtuon ko og ayo. Ug mao nga ang bag-o na lang ang akong gigamit, tungod kadtong usa gisi-gisi na man kaayong tan-awon, para dalhon sa iglesia.

<sup>33</sup> Ug sa dihang giablihan ko na ang San Juan, kon diin makaplagan ang maong Kasulatan, gisugdan ko sa pagbasa ang ika-16 nga kapitulo, ug ang bersekulo nga akong ginapangita wala man didto. Busa nakahunahuna ko, “Pagkatalagsaon!” Akong gibuklad pag-usab; wala gihapon didto.

<sup>34</sup> Ug si Igsoong Jack Moore, nga taga-Shreveport, Louisiana, nga usa ka suod kong higala, atua man sab siya didto. Ingon ko, “Igsoong Jack, dili ba makita man kana sa San Juan 16?”

Ingon siya, “Oo.”

<sup>35</sup> Ug mitindog kining Katoliko nga pari gikan sa iyang gilingkoran, gikan sa halos usa ka gatus nga mga ministro nga nagalingkod pud sa entablado; miduol siya kanako, nga sul-ob ang tanan niyang mga kupo ug hatag-as nga bisti ug mga krus, ug uban pa, ug miduol mismo kanako. Ug miingon siya, “Anak ko, pag-kalma lang. Nagaandam na nga manglihok ang Dios.”

Sa hunahuna ko, “Usa ka Katolikong obispo ang mosulti kanako niana?”

Ingon siya, “Basaha kini sa akong Libro.”

<sup>36</sup> Ug gibasa ko ang maong Kasulatan gikan sa iyang Libro, ug gikuha ang akong teksto ug nagpadayon, nga giwali ang akong sermon.

<sup>37</sup> Pagkahuman, sa natapos na ko, mitindog siya sa paghawa na nako, ug miingon, “Adunay usa ka butang nga kinahanglan mahitabo. Pagkahuman niana, kinahanglan makagawas ang iglesia gikan sa kagubot nga nahimutangan niini, o kaha kinahanglan natong makagawas gikan sa kagubot nga nahimutangan sa iglesia.” Busa, ang usa ba kaha o ang usa pa.

<sup>38</sup> Ug pauli na ako, pabalik didto sa Tucson, niadtong gabhiona. Nangayo man ang mga bata og sandwich, ug mao nga mihunong ako aron mopalit og sandwich sa usa ka gamay’ng tindahan. Ug miingon ang akong asawa, “Bill, wala pa gyud ko sukad gikulbaan og ayo sa tibuok kong kinabuhi, nga nakita ka nga nagtindog didto nga nagsige’g pakli og ayo niadto nga Biblia.” Miingon, “Wala ka ba gipanerbiyos niadto?”

<sup>39</sup> Ingon ko, “Wala.” Ingon ko, “Nasayod man ko nga anaa ra gyud kadto sa kung asa man didto. Wala lang nila nalakip ang maong panid. Usa kadto ka sayup nga pag-imprinta.”

<sup>40</sup> Ug ingon niya, “Ang hunahunaon, nga hinatag ko baya kanimo kadto nga Biblia! Mora gud og ang tanang mata anaa nakatan-aw kanako mismo.”

<sup>41</sup> Ug ingon ko, “Bueno, wala na ka’y mahimo pa niana. Usa kadto ka sayup nga pag-imprinta sa Biblia.” Ingon ko, “Wala lang gyud nila nalakip ang maong panid.”

<sup>42</sup> Bueno, milingkod ako ug gitan-aw kadto pag-usab, kumpleto man kadto; apan ang tumoy sa ika-16 nga kapitulo, nga bahin, ang bahin niadto nga mga tulo lang ka pulgada gikan sa ubos, sa ika-17 nga kapitulo sa pikas bahin, mao ra man. Ug, tungod nga usa man ka bag-ong Biblia, ang maong duha ka panid nagdikit gayud og ayo, ug nagabasa diay ko gikan sa ika-17 nga kapitulo imbis unta nga sa ika-16. “Bueno,” ingon ko, “okay ra kana. Para kana sa kung unsa man nga hinungdan.”

<sup>43</sup> Ug sa ingon ka klaro nga madungog mo ang unsa man nga tingog, usa ka Tingog ang miabot kanako, ug miingon, “Miadto Siya sa Nazaret, kon diin Siya nagdaku; ug misulod ngadto sa sinagoga, sumala sa Iyang nabatasan na. Ug gihatag Kaniya sa sacerdote ang mga Kasulatan aron basahon, ug gibasa Niya ang Isaias 61. Ug sa nabasa na Niya ang mga Kasulatan, milingkod Siya; giuli ngadto sa sacerdote ang Biblia, ang Basahon, ug milingkod. Ug ang tanang mga mata sa kongregasyon nanagtan-aw Kaniya. Ug bililhong mga Pulong ang migula gikan sa

Iyang baba. Ug Siya miingon, ‘Karong adlaw kining Kasulatan natuman.’”

“Karong adlaw kining Kasulatan natuman.”

<sup>44</sup> Pagkatukma gayud sa Kasulatan! Kung inyong himatikdan kini diha sa Isaias 61:1 hangtud sa 2, kon diin nagabasa ang atong Ginoo, sa Isaias 61:1 hangtud sa 2. Apan sa tunga-tunga na sa ika-2 nga bersekulo sa Isaias 61, mihunong Siya. Kon diin gikaingon, “Ang Espiritu sa Ginoo ania Kanako; aron sa pagmantala sa nahimut-ang tuig,” dayon mihunong na Siya. Ngano man? Ang laing bahin, nga para maghatud og paghukom, wala man napahinungod sa Iyang unang pag-anhi, kondili sa Iyang ikaduhang Pag-anhi. Kita n’yo, wala kini napahinungod kaniadto. Ang mga Kasulatan dili gayud nagakasayup! Kanunay Kining hingpit. Mihunong si Jesus sa kung asa lang usab mihunong ang Kasulatan, tungod mao man kadto ang eksaktong pagapanghimatud-an sa Iyang panahon, kaniadto, niadtong unang pag-anhi. Sa ikaduhang Pag-anhi magahatud na Siya og paghukom sa yuta; apan dili kaniadto. Siya kaniadto “magamantala sa nahimut-ang tuig.”

<sup>45</sup> Himatikdi ang Mesias nga nagatindog sa entablado kaniadto, aron ipaila ang Iyang Kaugalingon pinaagi sa Pulong nga saad alang niadto nga panahon. Makahibulong, ang Mesias nga nagatindog kaniadto sa atubangan sa iglesia! Ug matikdi kining bililhon nga mga Pulong, sa dihang gisulti Niya dinhi, “Aron sa pagmantala sa nahimut-ang tuig.”

<sup>46</sup> “Ang nahimut-ang tuig,” sumala sa nahibaloan natong tanan, ingon nga mga nagabasa sa Biblia, mao “ang tuig sa jubileo.” Nga, pag ang tanang mga ulipon ug mga binilanggo, ingon nga sila’y, gipangdakup, nga mga binilanggo; ug kinahanglan ihatag ang usa ka anak nga lalaki, aron bayaran ang utang; o kaha usa ka anak nga babaye, aron bayaran ang utang, [Blangko nga bahin sa teyp—Ed.] ug sila’y anaa sa pagkaulipon. Bisan unsa man ka dugay silang anaa sa pagkaulipon, o unsa ka dugay silang magpabilin didto; pagmoabot na ang tuig, sa jubileo, pagmotingog na ang trumpeta, ang matag tawo mamahimo nang gawasnon kung gusto gyud niyang makahilwas. [Blangko nga bahin sa teyp.] Gawasnon ka na. Dili ka na ulipon.

<sup>47</sup> Apan kung gusto mong magpabilin gihapon nga usa ka ulipon, kung ingon-ana kinahanglan kang dalhon ngadto sa templo, motindog tupad sa haligi sa templo, ug mokuha sila og usa ka igtutuhog ug bangagan ang imong dalunggan, ug pagkahuman kinahanglan mong alagaran ang maong agalon sa nahibilin mong mga adlaw.

<sup>48</sup> Pagkahingpit niini nga panig-ingnan sa Ebanghelyo ni Jesus Cristo! Pag naiwali na Kini, ang nahimut-ang tuig, ug ang panahon sa Jubileo; ang si kinsa mang tawo, bisan kinsa ka



man, unsa ma'y imong kolor, sa unsang denominasyon ka man nahisakop, bisan unsa pa ka halawom ang pagkaunlod mo sa kasal-anan, o kung unsa ma'y problema kanimog; mamahimo ka nang gawasnon sa diha nga nadungog mo nga mitingog na ang trumpeta sa Ebanghelyo. Gawasnon ka na!

<sup>49</sup> Apan kung imong talikdan ang Mensahe ug magdumili nga patalinghugan Kini, himatikdi, nabangagan ka na sa dalunggan, pinaagi sa usa ka igtutuhog. Nagapasabot, kana, nga nalatas mo na ang utlanan tali sa grasya ug paghukom, ug dili mo na gayud mapatalinghugan ang Ebanghelyo pag-usab. Dili ka na makahilingkawas pa. Sigurado gyud nga mamahimo kang ulipon sa sistema nga imong nahimutangan, sa nahibilin mong mga adlaw, kung magdumili ka nga patalinghugan ang nahimutang tuig.

<sup>50</sup> Bueno, ang laing bahin niini, sa ako nang gikaingon, dili na kinahanglan pang tubagon, tungod kay kining moabot nga Mesias, sa karon nga panahon, mao'y sa diha nga maghatud na Siya og paghukom.

<sup>51</sup> Karon, giunsa man pagkapakyas niadto nga mga tawo nga makita kaniadto kung Kinsa Siya? Giunsa man nga wala nila makit-i kadto? Giunsa man pagkahitabo niadto, nga unta klaro man kaayo kadto nga naipadayag ug naipakita? Giunsa man nga wala nila makit-i kadto? Sa diha nga Siya. . .

<sup>52</sup> Pagkaanindot nga Pulong! Palandunga ninyo kini, "Karong adlaw kining Kasulatan natuman sa inyong atubangan mismo." Kinsa ba ang nagsulti niini? Ang Dios Mismo, nga Mao ang tighubad sa Kaugalingon Niyang Pulong. "Karong adlaw kining Kasulatan natuman." Ang Mesias, Mismo, nga nagatindog sa atubangan sa kongregasyon ug nagabasa sa Pulong gikan sa Biblia, nga nakapahinungod sa Iyang Kaugalingon, ug dayon nagaingon, "Karong adlaw kining Kasulatan natuman," ug sa gihapon napakyas sila nga makita Kini.

<sup>53</sup> Daw sa unsa ka masubo nga panghitabo kadto, apan nahitabo gyud kadto. Nahitabo kini sa makadaghan nang higayon. Giunsa man pagkahitabo niini? Siyempre, sama sa nangahitabo sa ubang mga panahon, tungod sa pagtoo sa interpretasyon sa tawo mahitungod sa Pulong. Mao kana'y hinungdan niana. Kadtong mga magtotoo niadtong panahona, mga magtotoo kono, gidawat nila ang interpretasyon sa kung unsay gisulti sa sacerdote mahitungod sa Kasulatan. Busa si Jesus, tungod nga wala nahisakop sa bisan unsa man sa ilang mga pundok o sa ilang mga kapunongan, nan gipalagpot Siya gikan sa kadaghanan kanila.

<sup>54</sup> Ug, busa, dili nila Siya mahilambigit kanila, tungod kay Siya'y lahi man kanila. Ang Persona ni Jesus Cristo talagsaon kaayo nga walay ni usa unta ang angay'ng mapakyas nga makita

nga kadto mao ang Anak sa Dios, tungod kay Siya man ang hingpit nga pagpa-ila sa Kasulatan nga nasulat mahitungod Kaniya.

<sup>55</sup> Sa ingon nianang paagi maila ang si kinsa man nga Cristohanon, pag ginapaila sa iyang kinabuhi ang mismong mga butang nga angay ng buhaton sa Cristohanon.

<sup>56</sup> Giunsa man Niya pagbarug didto ug miingon, “Karong adlaw kining Kasulatan natuman sa inyong atubangan mismo!” Pagkamaayo kaayo, pagkatataw kaayo, ug sa gihapon wala man mahisabti niadto nga mga tawo. Ngano man? Tungod kay gidawat man nila ang interpretasyon sa kung unsa nga pundok sa mga sacerdote nga ilang ginapatalinghugan.

<sup>57</sup> Ug kanunay nang nagakahitabo pag-usab ang kasaysayan. Ug ang Kasulatan adunay dobleng kahulogan Niini, ug dobleng kapadayagan.

<sup>58</sup> Pananglitan, sama sa ginaingon sa Biblia, nga, “Gikan sa Egipto gitawag ko ang akong anak,” nga nagpahinungod kang Jesus. Tan-awa n’yo ang daplin niana, ug makita ninyo, nga nagpahinungod usab kana kang Jacob, ang pareho ra nga Kasulatan. Si Jesus man mao ang Iyang labing halangdon nga Anak. Si Jacob mao ang Iyang anak nga gitawag Niya gikan sa Egipto, nga mao ang ginapahinungod sa Scofield ug sa tanang uban pa nga sama niana, tungod kay mao kana ang Kasulatan nga ginapahinungod niana. Busa aduna kana og—og duha ka tubag; aduna kana’y tubag sa pagtawag kang Jacob pagawas, ug sa pagtawag kang Jesus pagawas.

<sup>59</sup> Ug mao man usab kini sa karon! Tungod kay ania na kita sa hilabihan nga pagkalibog nga atong nadangtan, ug mao nga nangapakyas ang mga tawo nga makita ang Kamatuoran sa Dios, tungod sa daghan kaayong hinimo’g-tawo nga mga interpretasyon mahitungod sa Pulong sa Dios. Wala man magkinahanglan ang Dios kang bisan kinsa aron nga hubaron ang Iyang Pulong. Siya mao ang Kaugalingon Niyang tighubad.

<sup>60</sup> Ngani miingon ang Dios, sa sinugdanan, “Motungha ang kahayag,” ug nagkaaduna og kahayag. Wala na kana nagkinahanglan og paghubad.

<sup>61</sup> Miingon Siya, “Usa ka ulay ang manamkon,” ug nanamkon ang maong babaye. Wala na kana nagkinahanglan og unsa man nga paghubad.

<sup>62</sup> Sa dihang . . . Ang interpretasyon sa Dios sa Iyang Pulong mao’y sa diha nga Iyang panghimatud-an ug pamatud-an Kini nga mao gayud. Mao kana ang Iyang interpretasyon, pinaagi sa pagpahitabo niana. Mao kana ang interpretasyon sa Dios, sa diha nga Iyang ginapahitabo ang Iyang Pulong. Ginahubad Niya Kini para kaninyo.

<sup>63</sup> Sama ra kaniadtong wala pa nagkaaduna og kahayag, ug miingon Siya, “Motungha ang kahayag,” ug nagkaaduna gayud, wala na kana nagkinahanglan pa og kinsa man aron hubaron kana.

<sup>64</sup> Apan atong gisagolan Kini og mga sistemang hinimo’g-tawo, ug, pag buhaton na ninyo, inyong—inyong ginapawala Kini sa linya. Ingon na niana kini sa una pa.

<sup>65</sup> Apan akong mahunahuna sa gihapon kung unsa kadto ka makapakurat siguro. Hunahunaa ninyo, ang Mesias! Nganong napakyas man sila nga makita Siya? Tungod kay, ang ila mismong mga lider nga angay unta nga nakaila Kaniya, nga mga batid man unta sa Kasulatan, og mga nanagpakasabot man unta sa mga Kasulatan, gikaminoson hinoon nila kini nga Tawo ug miingon, “Siya’y usa ka ilehitimo nga anak, sa—sa sugod pa lang. Dili kami motoo Kaniya.”

<sup>66</sup> Milabay ang mga katuigan, wala kita mitoo niana. Magpakamatay kita mismo sa pagsulti nga Siya’y usa gayud ka Anak nga natawo-sa-ulay.

<sup>67</sup> Ug mahitabo gayud sa umaabot nga adlaw nga, ang mismong mga butang nga atong nakita nga ginabuhay ni Jehovah sa karon, ang mga tawo sa mga moabot pang kapanahonan, kung aduna man, andam magpakamatay mismo sa mao mismong butang nga atong ginahisgotan sa karon. Buhaton ninyo kana sa diha nga moabot na ang marka sa mapintas nga mananap, ug dili na kamo tugotan para magwali sa Maayong Balita sa ingon niini nga paagi. Pagmagkatipon-tipon na ang kapunongan sa mga iglesia, nga nahan-ay na karon alang sa pang-kalibutan nga iglesia, nan kinahanglan na ninyong selyohan ang inyong pagpamatuod pinaagi sa kaugalingon n’yong kinabuhi, para Niini.

<sup>68</sup> Kinahanglan mong toohan Kini karon. Kung mabanhaw lang kadtong mga sacerdote, nga nanaghukom Kaniya kaniadto, dili gyud unta nila hukman Siya. “Apan,” moingon ka, “kung atua lang ako didto, siguradong gibuhay ko ang *ingon niini-ug-ingon niana.*” Bueno, dili kadto ang imong kapanahonan. Kondili, mao kini ang imong kapanahonan, kini na ang maong panahon.

Moingon mo, “Bueno, kung ania lang unta Siya!”

<sup>69</sup> Miingon ang Biblia, “Siya mao sa gihapon kagahapon, karon, ug hangtud sa kahangturan,” mao ra gihapon, busa ania Siya. Apan, ania Siya. Ingon nga ang kalibutan nahimo nang sibilisado, mas naglambo pa, ug mas edukado; ania Siya sa porma nga Espiritu, nga dili na nila mahimong patyon o pagapuohon. Namatay na man Siya kausa; og dili na Siya mahimong mamatay pag-usab. Kinahanglan Niyang mahimong unod kaniadto aron nga mamatay ang Dios diha sa unod, tungod sa sala. Apan niingon higayona dili na gyud Siya mahimong mamatay pa; ang Balaang Espiritu na man Kini.

<sup>70</sup> Karon, ang hunahunaon lang nga aduna sila kaniadto og mga butang batok Kaniya! Usa pa, wala Siya nagpasakop sa bisan unsa sa ilang pundok. Dayon, nakita n'yo, nagpahimo gihapon kadto Kaniya nga usa ka dautang tawo. Wala Siya nagpamiyembro sa ilang—ilang mga organisasyon, wala usab nagpamiyembro sa ilang pagka-sacerdote, ug wala Siya'y unsa man nga kahilambigitan niadto. Ug dayon, gawas nianang tanan, gipaningkamotan pa gyud Niyang gubaon kung unsay ilang gipangtukod kaniadto.

<sup>71</sup> Misulod Siya ngadto sa templo. Ginatawag nato Siya nga usa ka maaghop nga Tawo; Siya'y maaghop gayud, apan sa makadaghang higayon wala nato mahisabti kung unsa ba gyud ang kaaghop.

<sup>72</sup> Usa Siya ka Tawong maloloy-on, apan bisan pa niana napakyas kitang masabtan kung unsa ba gyud ang kalooy. Dili nga tawhanong pagkalooy, dili kana kalooy. Kondili, ang *kalooy* mao ang “pagbuhat sa kabubut-on sa Dios.”

<sup>73</sup> Miagi Siya kaniadto sa kaligoanan didto sa—sa Betsaida, sa ganghaan. Nanaghigda ang mga tawo didto, mga panon kanila. Pag panon wala kana'y pihong gidaghanon. Apan nanaghigda didto ang mga panon sa; piang, buta, kimpang, og mga paralitiko. Ug aduna gyud Siya'y kalooy sa mga tawo, sa kanunay. Ug miduol Siya ngadto sa usa ka tawo nga dili gani piang, buta, kimpang, ni paralitiko man; tingali'g ang maong tawo adunay sakit sa prostate, tingali'g aduna siya'y diyutay'ng kaluyahon nga pagkakulang-kulang. Traynta'y-otso ka tuig na siyang ingon niadto. Wala kadto nakapabalaka kaniya, dili pud kadto makapatay kaniya. Nagahigda ra siya didto sa usa ka banig. Ug miingon si Jesus, “Gusto mo bang mamaayo?”

<sup>74</sup> Ug miingon ang maong tawo, “Wala ma'y tawo nga magatuslob kanako sa tubig, apan pagmopaingon na gani ko, bueno, aduna na'y makauna kanako sa pag-ubog.” Kita n'yo, makalakaw man siya, makakita siya, makalibot-libot siya, apan luya lang gyud siya.

<sup>75</sup> Ug miingon si Jesus kaniya, “Bumangon ka. Dad-a ang imong higdaanan ug pauli na sa inyong balay.” Ug gipangutana si Jesus mahitungod niadto, kay inyong mahinumduman nga miingon man ang Kasulatan niini.

<sup>76</sup> Dili ikatingala! Kung moanhi sab Siya sa Jeffersonville karong gabhiona ug mamuhat nga sama niana, higsotan gihapon nila Siya.

<sup>77</sup> Apan, hinumdumi, nga mianhi Siya kaniadto aron buhaton ang usa ka butang, ang kabubut-on sa Dios. Karon, makita kana sa San Juan 5:19, og makuha ninyo ang tubag. Miingon Siya, “Sa pagkatinuod, sa pagkatinuod, magaingon Ako kaninyo, walay bisan unsa nga arang mabuhat ang Anak sa Iyang Kaugalingon;

gawas lamang sa Iyang makita nga ginabuhat sa Amahan, ginabuhat usab kana sa Anak.”

<sup>78</sup> Karon, hingsayran nila unta nga mao na kadto ang mismong kapanghimatuoran sa propesiya ni Moises, “Kay ang Ginoo nga inyong Dios magpatindog og usa ka Propeta nga sama kanako.”

<sup>79</sup> Namatikdan ba ninyo, sa dihang nakita ni Jesus ang maong tawo, Siya miingon. . . hingsayran ni Jesus nga anaa siya sa ingon niadto nga kahimtang sulod sa daghan nang mga katuigan. Kita n’yo, ingon nga usa ka Propeta, nakita na Niya kadto nga tawo sa ingon niadto nga kahimtang; ug miadto didto ug milakaw—milakaw Siya sa taliwala niadtong mga tawo, midutdot sa taliwala sa kadaghanan, hangtud nga nakaplagan Niya ang maong tawo.

<sup>80</sup> Gilabyan ang mga piang, kimpang, buta, ug mga paralitiko, bisan pa nga Siya usa ka Tawo nga puno sa kalooy. Apan, ang *kalooy* mao man ang “pagbuhat sa kabubut-on sa Dios.”

<sup>81</sup> Karon, hingsayran nato nga Siya, tungod nga ayaw Niya nga magpasakop kanila, ayaw Niya nga magkaaduna og unsa man nga kahilambigitan sa ilang pundok, busa gisalikway Siya. Ayaw Niya nga magkaaduna og unsa man. . .

<sup>82</sup> Gawas pa niana, misulod Siya sa templo usa niadto ka adlaw. Usa ka Tawo ang misulod didto ug nakaplagan ang balay sa Dios nga ingon na ka hugaw nga sama sa kung unsa kini karong panahona. Nagapamalit sila didto, nagapamaligya, og nagapabaylo og salapi. Ug Iyang gipangbalintong ang mga lamesa nga adunay kuwarta; mikuha og mga pisi ug gisalapid kadto, ug gipangbunalan ang mga tigpabaylo-og-salapi aron manggawas sa templo. Ug mitan-aw kanila nga may kasuko, ug miingon, “Nahisulat kini,” alleluyah, “Ang balay sa Akong Amahan usa ka balay sa pag-ampo; ug gihimo ninyo kining langub sa mga tulisan. Ug kamo, tungod sa inyong mga tradisyon, gihimo n’yong walay epekto ang mga kasugoan sa Dios.”

<sup>83</sup> Oh, mahimo ba kaha sa ingon niadto nga pundok nga motoo Kaniya? Dili, sir. Dugay na silang nagsige’g ligid nga mora’g mga baboy diha sa lunang sa mga kapunongan ug kahugawan sa maong panahon, hangtud nga bug-os na silang nanggahi sa ilang simbahan hangtud nga dili na nila mabati ang mga paglihok sa Gahum sa Dios nga Makagagahum-sa-tanan. Dili ikatingala nga nahikap sa makalulooy’ng babaye ang Iyang bisti ug naayo pinaagi Niini; ug usa ka hubog nga sundalo ang nagluwa sa Iyang nawong ug wala man la’y gibati nga gahum! Nagadepende ra kana sa inyong pagtagad Niini. Nagadepende kana sa kung unsa gyud ang inyong ginapangita. Sa diha nga mosimba kamo, nagadepende pud kana sa kung unsa ba ang inyong ginapangita.

<sup>84</sup> Karon makita nato Siya nga nagatindog didto. Walay pagduhaduha nga gipasidan-an na siya sa mga tawo, gipasidan-

an...gipasidan-an na sa sacerdote ang mga tawo, “Bueno moanhi Siya dinhi sa sunod nga adlaw’ng Igpapahulay, ug, pagmoabot na Siya, ayaw ninyo Siya patalinghugi. Karon, mahimo ninyong motambong ug molingkod dinhi, apan ayaw n’yo panumbalinga kung unsa ma’y Iyang isulti, tungod kay dili man Siya miyembro sa atong grupo. Usa Siya ka sinalikway. Wala Siya’y fellowship kard. Wala gani Siya’y organ-...dala nga usa ka dokumento sa organisasyon. Wala Siya’y unsa man nga ingon niana.”

“Unsa man diay Siya?”

<sup>85</sup> “Usa ka tampalasan nga batang lalaki nga gikahimugso dinhi, gikahimugso nga ilehitimo, sa panimalay sa usa ka panday, og nga gisamkon na Siya sa usa ka inahan sa wala pa man sila naikasal, ug ginapaningkamotan pa nilang ililong ang maong butang pinaagi sa kung unsang supernatural nga butang.

<sup>86</sup> “Nasayod na man ’ta nga, pagmoabot ang Mesias, mokanaug Siya diha sa mga pasilyo sa Langit ug moadto sa atong labaw’ng sacerdote ug moingon, ‘Ania na Ako, Caifas.’” Apan atong nahibaloan nga wala Niya gibuhat kadto sa ingon niana nga paagi, tungod kay dili man ingon niana ang nahisulat diha sa Pulong. Usa ka tradisyon nga hinimo’g-tawo ang nagpahinungdan kanila nga motoo niadto.

<sup>87</sup> Miingon ang Pulong nga moabot Siya sumala gayud sa kung unsa lang ang Iyang pag-abot. Ug atua Siya nga nagtindog, nagabasa sa Pulong, ug nagaingon kanila, “Karong adlawa kining Kasulatan natuman sa inyong atubangan mismo.” Ug napakyas gihapon sila nga makita Siya o maila Siya, sama nila kaniadto sa tanang uban pa nga mga kapanahonan.

<sup>88</sup> Mahimong nasulti usab ni Noe ang mao rang butang, sa adlaw nga misulod na siya sa arka ug nasirhan ang pultahan. Mahimong gipataas ni Moises kadtong bintana sa ibabaw sa arka, og midungaw sa kongregasyon...Hinumdumi, gisirhan sa Dios ang maong pultahan. Ug mahimong nagsulti siya, “Karong adlawa kining Kasulatan natuman sa inyong atubangan mismo,” apan ulahi na man para kanila niadtong tungora. Nagwali na siya sulod sa usa ka gatus ug baynte ka tuig, sa pagpaningkamot nga mapasulod sila niadtong sakayan nga iyang gihimo, og ginasulti kanila nga ang Kasulatan miingon, “MAO KINI ANG GINAINGON SA GINOO, magaulan,” apan naglangay-langay pa sila og dugay. Apan masayon ra nga gisulti ni Noe nga, “Karon, niining adlaw, ang Kasulatan natuman.”

<sup>89</sup> Si Moises, sa mao ra nga adlaw nga mikunsad ang Haligi nga Kalayo didto sa Bukid sa Sinai ug nagpamatuod sa iyang testimonyo, mahimong miingon sab si Moises, “Karong adlaw kining Kasulatan natuman.”

<sup>90</sup> Si Moises, kabalo na man mo, nga usa siya ka tinawag nga tawo sa Dios, usa ka propeta. Ug samtang gitawag siya, ingon

nga usa ka propeta, kinahanglan 'sa niyang magkaaduna og supernatural nga kasinatian. Aron mahimong usa ka propeta, kinahanglan 'sa niyang mahinagbo ang Dios sa nawong og nawong ug makapakig-estorya Kaniya. Ug usa pa ka butang, kung unsa ma'y gisulti niya kinahanglan pud nga mamatuman, kay kung dili walay ni usa unta ang mitoo kaniya.

<sup>91</sup> Busa walay tawong may katungod nga tawgon ang iyang kaugalingon nga ingon niana gawas kung nakapakig-estorya na siya nawong og nawong sa Dios, didto sa luyong bahin sa disyerto sa kung asa man, diin nahinagbo niya ang Dios, siya mismo. Ug bisan ang tanan pang mga ateista sa kalibutan dili makahimo sa pagsaysay niana pahilayo kaniya; atua man siya didto, nasayod siya mismo nga nahitabo kana. Ang matag Cristohanon kinahanglan magkaaduna 'una niana nga kasinatian sa dili pa sila mosulti og unsa mang butang mahitungod sa ilang pagka-Cristohanon. Aduna gyud ka og kaugalingon mong kasinatian!

<sup>92</sup> Giestorya ko ang akong pag-umangkong nga lalaki, kaganina, usa ka batan-ong Katoliko, nga miingon, "Tiyo Bill, nakaabot na ako sa bisan asa na lang, nagaadto sa bisan asa, sa pagpaninguha nga makakaplag ko og usa ka butang." Matag gabii, sa wala pa nagsugod kini nga panagtigum, nagsige siya'g hilak. Ug sa kagabhion, nagadamgo siya og mga damgo nga kono nagasulod siya, nagaduol paingon sa altar, kon diin adunay nagawali, ug nagapangayo'g pasaylo nga nasayup siya.

<sup>93</sup> Miingon ko, "Melvin, bisan asa ka man maninguhang moadto, unsa man ka daghang iglesia ang imong apilan, unsa man ka daghang 'Maghimaya ka Maria,' ang imong isulti, o unsa man ka daghang bendisyon ang imong madawat gikan sa tawo, kinahanglan mo gayud nga matawo pag-usab sa Espiritu sa Dios. Mao lang kana ang bugtong butang nga makapatagbaw sa kasingkasing sa tawo."

<sup>94</sup> Kana'y, sa akong nasayran aduna sila'y pangpuli, karong panahona, sa pagkahimong usa ka natawo na pag-usab, ang pagpakiglamano lang kono sa magwawali ug isulat ang imong ngalan sa libro. Apan, mga higala, usa ra kana ka dogma. Dili kana Kamatuoran sa Biblia. Kung mao man gani, nan ang Mga Buhat sa mga Apostoles, sa ika-2 nga kapitulo, mabasa unta nga ingon niini, "Sa pag-abot na sa Adlaw sa Pentecostes, migawas ang pastor ug nakiglamano sa mga tawo."

<sup>95</sup> Apan ang gikaingon, "Sa pag-abot na sa Adlaw sa Pentecostes," sa pagsugod sa Iglesia kaniadto, "may miabot nga dahunog gikan sa Langit sama sa usa ka nagahaguros nga makusog nga hangin, ug mipuno sa tibuok balay diin didto sila nanaglingkod." Ingon niana ang pag-abot sa Balaang Espiritu sa unang higayon. Sa ingon niana usab Kini nagaabot sa matag

higayon sukad niadtong panahona. Dios Siya, ug dili gyud nagakausab. Karon, nagakapangdol Niini ang mga tawo.

Ginaingon nila, “Para ra man kana sa laing panahon.”

<sup>96</sup> Bueno, Siya mao man sa gihapon kagahapon, karon, ug hangtud sa kahangturan. Sa matag higayon nga madawat sa Iglesia ang Espiritu Santo, nagaabot Kini kanunay nga sama kaniadtong miabot Siya sa unang higayon, ilalum sa mao gihapon nga reseta, Mga Buhat 2:38; wala gayud nausab, og dili gyud mausab.

<sup>97</sup> Sama ra sa reseta sa doktor para sa usa ka sakit. Magsulat siya og reseta para sa usa ka sakit, ingon-ana ang ginabuhay sa doktor. Ug kon dalhon kini ngadto sa usa ka mini nga tigbaligya og mga tambal, dayon butangan niya kini og ingon ra ka kusog nga panambal, mahuyang kini nga dili na kini makahatag og unsa man nga kaayohan kanimo; kung butangan niya usab kini og mas kusog nga panambal, nan makapatay sab kini kanimo. Kinahanglan maisulat kini sumala lamang sa gikaingon sa doktor.

<sup>98</sup> Ug ang reseta sa doktor kung sa unsang paagi madawat ang Espiritu Santo gikahatag na kanato ni Doktor Simon Pedro, kaniadtong Adlaw sa Pentecostes. “Hatagan ko kamo og reseta. Paghinulsol kamo, ang matag usa kaninyo, ug magpabautismo sa Ngalan ni Jesus Cristo alang sa kapasayloan sa inyong mga sala, ug madawat ninyo ang gasa nga Espiritu Santo. Kay ang maong reseta alang sa bisan kanila nga atua sa halayo, ug bisan ang kapid-an nga pagatawgon sa Ginoo nga atong Dios.” Ang Walay Katapusan nga reseta!

<sup>99</sup> Aduna usab og ingon-ina nga kasinatian si Moises kaniadto. Miadto siya didto sa maong nasud ug gisugdan niyang sultihan ang mga tawo, “Akong nahinagbo ang usa ka Haligi nga Kalayo. Atua Kini sa nagadilaab nga sapinit. Ug giingnan Niya ako nga sultihan kamo, ‘AKO MAN ANG MAO AKO. Umadto ka; Ako magauban kanimo. Dalha ang sungkod nga anaa sa imong kamot ug ipataas kana didto sa Egipto; bisan unsa ma’y imong pangayoon, mamahimo kana.”

Bueno, tingali’g may usa ka sacerdote didto nga miingon, “Binuang!”

<sup>100</sup> Apan sa dihang nakita nila ang matuod nga mga kapanghimatuoran mahitungod niini, nga natuman, og nahitabo, wala na sila makapugong niini. Hingsayran nila nga pinadala gyud siya sa Dios.

<sup>101</sup> Dayon, kung miingon si Moises nga nakita niya kadto, ug nagpamatuod nga Kamatuoran kadto, nan obligado ang Dios, kung Kamatuoran man kadto, nga ilhon ug panghimatud-an ang pulong nianang tawhana, ingon nga mao ang Kamatuoran. Tinuod kana.



<sup>102</sup> Kung mibarug si Jesus Cristo didto ug nagbasa, niadtong adlaw, “Karong adlawa kining Pulong natuman sa inyong atubangan,” nan obligado ang Dios nga ipahitabo kadto nga Pulong.

<sup>103</sup> Nagabarug usab kita dinhi karong gabhiona ug nagaingon, nga, “Si Jesus Cristo mao sa gihapon kagahapon, karon, ug hangtud sa kahangturan.” Obligado ang Dios nga pamatud-an nga mao gyud kana, tungod kay Iya man Kining Pulong. Karon, unsa ma’y ginabuhath niini? Nagkinahanglan og pagtoo, aron matoohan Kini. Nagkinahanglan og pagtoo, aron matoohan ang Iyang Pulong, nga mao Kini ang Kamatuoran.

<sup>104</sup> Matikdi kung unsay nahitabo kaniadtong gipahigawas na ni Moises ang mga anak, ug ang tanang mga nanagsunod kaniya. Kadtong mga wala misunod nagpabilin ra sa Egipto. Apan kadtong mga misunod kang Moises, sa dihang migawas na sila sa Dagat nga Mapula ug nahidangat na ngadto sa kamingawan, mikanaug ang Dios didto sa Bukid sa Sinai. Gipadilaab niadtong Haligi nga Kalayo ang tibuok bukid, ug usa ka Tingog ang nakigsulti gikan didto, ug gihatag sa Dios ang napulo ka mga sugo.

<sup>105</sup> Tingali’g miduol si Moises kaniadtong atubangan sa mga tawo, ug miingon, “Karong adlaw ang Kasulatan nga gisulti ko kaninyo, ingon nga Iyang propeta, mahitabo niini nga adlaw. Gisultihan ko kamo nga gikahinagbo ako sa Dios, didto sa nagadilaab nga sapinit, sa usa ka Haligi nga Kalayo, ug gisulti Niya ang ingon niini, ‘Ako...Kini’y mamahimong usa ka ilhanan. Dalhon mo ang mga tawo pabalik mismo dinhi niini nga dapit pag-usab.’ Ug atua ang Dios, sa mao ra nga Haliging Kalayo nga gisulti ko kaninyo nga nahimutangan Niya, nga atua mismo ibabaw sa bukid. Karong adlaw natuman kini nga propesiya. Ania Siya aron panghimatud-an nga ang mga butang nga akong gisulti mao ang Kamatuoran.”

<sup>106</sup> Hatagan pa unta kita sa Dios og ingon niana nga mga kalalaken-an, nga matitud-anon ug sinsero, ug ginasulti ang Kamatuoran, nga mapanghimatud-an sa Dios nga Makagagahum-sa-tanan nga ang Iyang Pulong mao gihapon ang Kamatuoran! Nagapabilin Siya nga mao sa gihapon kagahapon, ug hangtud sa kahangturan. Nganong dili man Niya kini buhaton? Gisaad na gyud Niya nga buhaton kini.

<sup>107</sup> Tingali’g mao ra usab ang gisulti ni Josue, niadtong adlaw nga miabot siya didto sa Kadesh-barnea, kon diin mipanaw sila og ingon na ka halayo sa kamingawan. Giduhaduhan pa sa mga tawo ang maong yuta kon mao ba gyud kadto ang matang sa yuta nga gikasulti sa Dios. Apan gisultihan na sila sa Dios nga usa kadto ka maayong yuta, nga nagapaagay kadto og gatas ug dugos. Ug si Josue ug si Caleb lang ang duha nga magatoo niini, gikan niadtong uban pang napulo nga mipanaw. Sa pagbalik

nila, dala na nila ang ebidensiya; aduna sila'y usa ka pungpong sa ubas nga duha ka kusgan nga lalaki lamang ang makadala.

<sup>108</sup> Si Josue ug si Caleb tingali'g mitindog didto mismo ug miingon, "Karong adlawa natuman kining Kasulatan. Ania ang ebidensiya nga usa gyud kini ka maayong yuta." Oo. Ngano man? "Ania man ang ebidensiya nga usa kini ka maayong yuta. Asa man kamo makakuha og ingon niana nga mga butang, sa Egipto? Wala gayu'y ingon-anang mga dapit. Apan karong adlawa natuman kining Kasulatan."

<sup>109</sup> Tingali'g nasulti niya ang mao rang butang, usab, sa dihang nagpropesiya siya ug miingon nga mahugno ang mga paril sa Jerico human nila nga nagmartsa sa makapito ka higayon, pito ka adlaw, makapito ka higayon sa usa ka adlaw. Ug sa dihang nagmartsa na sila sa kaulahiing higayon, nangahugno gayud ang mga paril. Tingali'g mitindog si Josue kaniadto ug miingon, "Niining adlaw, ang Punoang Kapitan sa kasundalohan sa Ginoo nga nagsulti kanako pipila na ka semana ang milabay nga mahitabo kini nga ingon niini, karong adlaw natuman kining Kasulatan." Atua ang mga paril, nga nangahugno sa yuta. "Umari kamo, adto na ta ug angkonon kini. Atoa man kini. Karong adlaw natuman kining Kasulatan."

<sup>110</sup> Pagkamaanindot gayud, nga mibarug ang mga tawo sa Dios alang sa mga butang nga husto!

<sup>111</sup> Ang Israel, mitabok kaniadto, didto sa suba, sa diha nga ilang gipanag-iya ang maong yuta. Unsaon kaha nila pagbuhat niadto? Bulan kadto sa Abril. Nagabaha pa kaniadto tungod kay naganalay na ang niyebe, didto sa Judea. Oh, daw sa dili gyud maayo nga heneral ang Dios, aron dalhon ang Iyang katawhan didto, sa bulan sa Abril, sa diha nga ingon gayud ka habog ang Jordan kay sa kung unsa kini kaniadto. Usahay . . .

<sup>112</sup> Tingali'g mohunong 'usa ko dinhi, kung aduna pa ko'y oras, aron hatagan kamo og diyutay'ng pahimangno. Usahay tingali'g nagalingkod kamo dinha nga adunay kanser, o kaha nagalingkod kamo nga adunay balatian; og mahunahuna n'yo, "Nganong, ako, nga usa ka Cristohanon, ania man sa ingon-ani nga kahimtang? Nganong nagalingkod man ko nga naingon niini, kung usa ako ka Cristohanon?" Usahay ginatugotan man gud sa Dios nga mahimong ingon ka ngitngit ang mga butang nga dili ka na makakita, sa palibot, o kung asa ka na, ug dayon nagaabot Siya ug nagahimo og pamaagi alang kanimo, aron nga imong masulti, "Niining adlaw natuman kining Kasulatan, nga Iyang gisaad nga pagabuhaton."

<sup>113</sup> Gitugotan sab Niya ang Hebreohanong mga anak kaniadto nga maglakaw mismo sa nagdilaab nga hudno. Miingon sila, "Ang among Dios makahimo man sa pagluwas kanamo gikan niini nga kalayo sa hudno. Apan, bisan pa man, dili gihapon kami moyukbo nganha sa imong imahe." Sa dihang nanggawas

na sila didto, nga may baho sa hudno diha kanila . . . wala gyu'y baho sa hudno, diay, nga mitapot kanila; tingali'g nakasulti pud sila, "Karong adlaw natuman kining Kasulatan."

<sup>114</sup> Kaniadtong migawas si Daniel gikan sa langub sa mga leon, tingali'g mao sab gihapon ang iyang nasulti.

<sup>115</sup> Si Juan Bautista. Human sa upat ka gatus ka tuig sa eklesiastikal nga pagpanudlo, dili ikatingala nga ang maong iglesia anaa sa kalamukat niadtong panahona! Sa diha nga mitungha siya didto sa kamingawan, sa Jordan, tingali'g mibarug siya didto mismo sa tampi, maingon sa ginabuhay niya kaniadto, ug miingon, "Karong adlaw kining Kasulatan, Isaias 40, natuman na."

<sup>116</sup> Mohunong 'usa ko dinhi ug sultihan kamo kung unsay gisulti kanako niadtong tigulang nga pari! Miingon, "Anak, wala mo pa man natapos kana nga Mensahe."

Ingon ko, "Hilum lang."

Ingon siya, "Buot mo bang ipasabot nga wala kana makita sa mga Pentecostal?"

Ingon ko, "Wala."

<sup>117</sup> Ingon siya, "Nasabtan ko kini." Ug usa ka Katoliko nga pari, pa gyud! Uh-huh. Ingon siya, "Nganong wala ka man mipadayon?"

Ingon ko, "Hilum lang."

Ingon siya, "Himaya sa Dios! Nakita ko kini."

<sup>118</sup> Ug niadtong mga orasa mikunsad ang Espiritu Santo sa iyang igsoong babaye, nga nagalingkod didto sa panagtigum. Ug mitindog siya, nga nagasulti og dili-mailhan nga mga pinulongan, ug gihatag ang interpretasyon mahitungod sa mismong butang nga ginahisgotan ko ug sa maong pari, didto sa entablado. Ang tibuok iglesia, ang tibuok bilding, nanaghugyaw. Nagpadayon kadto hangtud sa konbensyon ni Oral Roberts niadtong miaging semana, o niadtong miagi pa nga semana, ug nahimong hisgotanan sa konbensyon. Kung unsa nga kadtong pari . . . Ilalum sa Balaang Espiritu, nahipadayag didto pinaagi sa usa ka babaye, nagtoo ko nga igsoon niya kadto, ang mahitungod sa nahitabo didto sa entablado, ug gipadayag ang maong butang nga among ginalilong.

<sup>119</sup> Sa takna nga atong ginapuy-an, niining adlaw natuman kining Kasulatan. Niining adlaw miabot ang pang-gabii nga mga Kahayag, ug napakyas kita nga makita Kini. Matikdi.

<sup>120</sup> Miingon si Juan, "Niining adlaw ako mao 'ang tingog nga nagasinggit sa kamingawan,' nga gikaingon na ni propeta Isaias. Andama ninyo ang dalan para sa Ginoo!"

<sup>121</sup> Wala nila kadto masabti. Miingon, "Oh, ikaw diay si Jesus . . . ikaw—ikaw ang Cristo," diay.

122 Miingon siya, “Dili ako ang Cristo.” Ingon siya, “Dili gani ako takus sa pagtangtang sa Iyang mga sandalyas. Apan,” ang ingon niya, “Nagatindog Siya sa inyong taliwala, dinha,” tungod kay sigurado man siya nga mamaatua gayud Siya. Mamaatua Siya sa iyang panahon, tungod gisultihan man siya sa Dios nga siya ang magpaila sa Mesias.

123 Usa niana ka adlaw usa ka batan-ong Lalaki ang nagalakaw paadto didto, ug nakita ni Juan ang daw sa usa ka Kahayag sa ibabaw sa maong Lalaki, usa ka ilhanan. Ug misinggit siya, “Tan-awa ang Cordero sa Dios! Karong adlawa kining Kasulatan natuman na sa atubangan ninyo.” Oo.

124 Sa Adlaw sa Pentecostes, mitindog mismo si Pedro ug gisulti ang ilang Kasulatan, ang mahitungod sa Joel 2:38. Kaniadtong, nangatawa silang tanan, kadtong mga tawo. Dili man makasulti ang mga tinun-an sa kaugalingon nilang pinulongan. Nagakutab-kutab sila og ubang pinulongan. Miingon ang Biblia, “Mga dila nga nabahinbahin.” Ang *nabahinbahin* usa ka “napahat-pahat” nga dila, dili nga walay unsa man nga ginasulti, kondili paspas lang nga pag-estorya. Nagsige’g dalagan nga mora’g usa ka pundok sa mga hubog nga tawo!

125 Ang ingon nilang tanan, “Aba, nangahubog kini nga mga tawo. Tan-awa n’yo sila, tan-awa n’yo kung unsa ang ilang mga panglihok, kung naunsa na silang mga kababayan-an ug kalalaken-an. Wala sila sa kahan-ayan,” ang ingon niadtong relihiyoso nga grupo kaniadtong panahona.

126 Mitindog si Pedro sa taliwala nila, og miingon, “Mga katawhan ug mga kaigsoonan, kamong mga nagapuyo sa Jerusalem, ug kamong mga nagapuyo sa Judea, kinahanglan mahibaloan ninyo nga kini sila dili mga hubog, maingon sa inyong ginadahum, sanglit karon ika-siyam pa man lamang ang takna sa kabuntagon. Apan kini mao ang giingon sa propeta nga si Joel, ‘Mahitabo sa kaulahiing mga adlaw, igabubo Ko ang Akong Espiritu sa tanang unod.’ Natuman karong adlawa kini nga Kasulatan.” Sigurado.

127 Ingon ka tukma lang nga panahon si Luther kaniadto. Ingon ka tukma lang nga panahon si Wesley. Ingon ka tukma lang nga panahon ang Pentecostes kaniadto. Walay unsa man nga wala sa kahan-ayan.

128 Karon hangyoon ko kamo nga hunahunaon ang panahon ug takna nga atong gikinabuhian karon, sumala sa gikasaad nga Pulong alang niining panahona. Kung sa ubang mga kapanahonan kaniadto, makasulti ang mga tawo, “karong adlawa kini nga Kasulatan,” “karong adlawa kini nga Kasulatan,” nan unsa man usab ang Kasulatan alang niini nga panahon? Unsa ma’y gikasaad alang niini nga panahon? Asa na man kita? Unsa na man ang takna nga atong ginapuy-an; sa

diha nga mopitik na ang orasan, ang siyentipikanhong orasan, nga tres minutos na lang sa dili pa motungang-gabii? Grabe na ang pagkanerbyos sa kalibutan. Ang iglesia nagahigda na sa higdaanan sa kahugawan. Walay si kinsa man ang nahibalo kon asa na sila. Unsa na kaha nga oras sa adlaw kini? Unsa na kaha nga Kasulatan ang alang niining panahon? Sa kahimtang pa lang mismo sa iglesia, o, ang mga kahimtang mismo sa iglesia sa karon!

<sup>129</sup> Sa kalibutan, sa pulitika, ang atong sistema sa kalibutan, ingon na gayud kini ka daut na. Dili ako pulitiko. Cristohanon ako. Bueno, wala ko'y katungod nga maghisgot og pulitika, apan gusto ko lang isulti nga pareho sila nga mga daut na.

<sup>130</sup> Mibotar ako sa makausa kaniadto, para kadto kang Cristo; og sigurado akong modaug. Mibotar batok kanako ang yawa, ug mibotar para kanako si Cristo; nagadepende ra sa kung asa ko igahatag ang akong boto. Malipayon ako nga gihatag ko kini Kaniya; pasagdi ang kalibutan kung unsa ma'y gusto nilang isulti. Nagatoo gihapon ako nga Siya mao sa gihapon kagahapon, karon, ug hangtud sa kahangturan. Pamatud-an Niya kana. Pamatud-an gayud Niya. Sigurado.

Nagkadaghan na ang krimen, ang kalapasan sa mga kabatan-onan!

<sup>131</sup> Tan-awa n'yo ang atong nasud, nga kaniadto mao ang bulak sa kalibutan. Ang atong bililhon nga demokrasya nga niadtong—niadtong. . . gipahayag ang atong kagawasan. Ug sa gipirmahan ang maong pagpahayag sa kagawasan, ug nakaangkon kita og demokrasya. Ug tungod sa atong bililhon nga mga unang amahan, ug sa mga butang nga ilang gipangbuhat; mao nga nagkaaduna kita og maanindot nga nasud.

<sup>132</sup> Apan nagakadaut na siya karon, ug nagakahugno, ug nagakatay-og, ug magun-ob na. Ug gapaningkamot nga mangolekta og buhis sa mga tawo, aron makapanguwarta para ipadala didto, aron mopalit og pagpakighigala sa ilang mga kaaway; og ginapangandak nila kini sa atoa. Unang gubat pang-kalibutan, ikaduhang gubat pang-kalibutan, ug nagapaingon na mismo kita ngadto sa pang-ikatulo. Sigurado gayud. Daut na ang pulitika, mahugaw na, og daut na gayud hangtud sa kinauyokan niini. Ingon ka eksakto gayud kung unsay gikaingon sa Mateo 24 nga mamahitabo, "Nasud nga mamahimong batok sa usa pa ka nasud, gingharian nga batok sa usa pa ka gingharian." Mahitabo kining tanang mga butanga. Palandungon na nato kini. Oo.

<sup>133</sup> Matikdi n'yo ang usa pa, ang pag-uswag sa siyentipikanhong mga pagtuki. Bueno, usa ka higayon niadto, usa lamang. . . Ang akong lolo kaniadto pagmoadto aron makigkita sa akong lola, mogamit og carro sa baka. Karon usa na ka eroplanong jet, o tuyokon na man gani ang kalibutan, gawas

sa kawanangan. Pagka-kahibulongan...Giunsa, kinsa man ang nagsulti niini? Sa Daniel 12:4, gikaingon, “Mouswag ang kahibalo sa kaulahiing mga adlaw.” Nakita na nato ang panahon nga atong ginapuy-an. Matikdi n’yo karon ang—ang kahimtang mismo sa kalibutan, ang kahimtang mismo sa siyensiya.

<sup>134</sup> Ug matikdi usab, karong panahona, ang atong sistemang pang-edukasyon. Karon ayaw n’yo sulaying ilimod pa kini. Aduna ko’y mga balita nga gigunting gikan sa mantalaan, mahatungod sa pagtudlo og pagpakighilawas diha sa atong mga sim-...sa atong mga tulonghaan, ngadto sa mga batanong estudyante nga magkaaduna og pagpakighilawas sa usa’g usa, aron mahibaloan kung puede ba sila mamahimong mga magtiayon sa kalibutan. Oo, sir.

<sup>135</sup> Unsa man usab sa atong mga pari? Karong gabhiona aduna ko’y usa ka artikulo nga gikan sa mantalaan. Didto sa Los Angeles, California, kon diin dunay pundok sa mga ministro, Baptist ug Presbyterian, nga mga ministro, nga nagdala og usa ka grupo sa mga bayot ug migawi usab sila ingon nga bayot, sa pag-ingon nga ginapaninguhaan ra man kono nilang kabigon ang mga niini ngadto sa Dios. Sa dihang, usa man kana sa mga tunglo sa niining panahon, ang pagka-Sodomanhon! Ug gipangdakup man gani sila sa kapulisan.

<sup>136</sup> Karon asa na man kita? Ang kinatibuk-an natong sistema daut na gayud sa ilalum nato. Nakita ko ang pagdaghan sa mga bayot sa tibuok Estados Unidos nga mitaas sa baynte o traynta ka porsyento kay sa niadtong miaging tuig. Hunahunaa n’yo kana, lalaki nga nakigpuyo uban sa lalaki, eksaktong sama gayud sa gibuhat nila kaniadto sa Sodoma.

<sup>137</sup> Hilabihan na ang pagdaghan sa krimen, ang kalapasan sa mga kabatan-onan! Unsa na man nga takna ang atong ginapuy-an? Niining adlawa natuman na kining Pulong sa propesiya.

<sup>138</sup> Ang relihiyosong kalibutan, ang iglesia mismo, ang iglesia, ang iglesiang tinawag-pagawas, nga ginatawag natong iglesiang tinawag-pagawas, ang ulahing kapanahonan sa iglesia, ang kapanahonan sa iglesiang Pentecostal, asa man kini? Anaa kini sa Laodicea, sumala sa gikaingon sa Kasulatan.

<sup>139</sup> Niining panahona ginapaubos na nila ang sukaranan. Halos hubo na ang ilang mga kababayan-an. Ang ilang mga kalalaken-an...Makalilisang kini nga butang. Ang uban kanila naminyo sa tulo o upat na ka higayon, nga mga anaa pa gyud sa hunta sa diyakono, ug tanan nang uban pa. Nagpasagad na sila, ug mao nga nakasulod na ang pagkadunot, tungod kay nanaglingkod man sila sa mga konseho ug midapig sa kalibutan.

<sup>140</sup> Ug, niining panahona, aduna sila og mas maanindot na nga mga bilding, kay sa kaniadto. Ngani sa usa ka lugar, ang usa kanila nakapatukod og singkwenta-ka-milyon-ka-dolyares

nga awditoryum, singkwenta ka milyon ka dolyares. Mga Pentecostal! Anaa lang sila kaniadto sa kanto, baynte-singko ka tuig na ang milabay, nga nagapatugtog og tamborin. Miingon, “Kami. . .”

<sup>141</sup> Tungod kay, miingon man ang Kasulatan, diha sa Pinadayag 3, nga kamo mga “‘Dato,’ miingon, ‘Dato ako. Nagalingkod ako ingon nga usa ka rayna. Walay nakulang kanako.’ Ug wala ka makahibalo nga ikaw diay alaut, makaluluoy, kabus, hubo, buta, ug wala makahibalo niini!”

<sup>142</sup> Karong adlaw natuman kining Kasulatan sa inyong atubangan. Amen! Ang *amen* nagakahulogan og “hinaut unta.” Wala ko naga-amen sa akong kaugalingon, kondili ang buut kong ipasabot nga nagatoo ako nga Kini mao ang Kamatuoran. Karong adlaw natuman kining Kasulatan.

<sup>143</sup> Ang iglesiang Pentecostal anaa na sa Laodicea nga kahimtang. Oh, nagalukso-lukso gihapon sila ug nagasinggit, ug kung unsa na lang ang ginabuhat pag nagatugtog ang musika. Pag mohunong na sa pagtugtog ang musika, o ang beatnik nga musika nga ginapatugtog sa pipila kanila ug ginatawag kana nga Cristianismo, ug pag mohunong na kana, mawala sab ang tanang kahimayaan. Oo.

<sup>144</sup> Kung tinuod gyud kana nga pagdayeg sa Dios, nan walay igong mga pito ug igong—igong gahum sa kalibutan ang makapahunong niana. Pag nagagikan gayud kana sa Dios, dili na kinahanglan pa og musika aron mahimong madasig. Ang Espiritu sa Dios ang gikinahanglan nga mokunsad diha niana. Mao lang kana.

<sup>145</sup> Ug dugay na nilang nahikalimtan Kini, tungod kay gipakaingon man nila nga ang gasa nga Espiritu Santo kono, “ang unang kapanghimatuoran Niini mao ang pagsulti og laing mga pinulongan.” Ug nakadungog man ko og mga yawa ug mga balbal nga nagasulti pud og laing mga pinulongan.

<sup>146</sup> Ang Espiritu Santo mao ang Pulong sa Dios nga anaa sa sulod ninyo, nga ginapaila ang Kaugalingon Niini pinaagi sa pagdawat sa Pulong. Gawas niana, dili kana mamahimo nga mao ang Espiritu Santo. Kung ginaingon niini nga ang Balaang Espiritu kini, ug ginapanghimakak ang usa ka Pulong sa Biblia, nan dili kini mamahimo nga mao ang Balaang Espiritu. Mao kana ang kapanghimatuoran kon nagatoo ba kamo o wala.

<sup>147</sup> Matikdi n’yo ang usa pa ka dakung ilhanan. Ang mga Judio anaa na sa ilang kaugalingong-yuta; sa kaugalingon nilang nasud, may kaugalingon na silang kuwarta, og miyembro na sa United Nations. May kaugalingon na sab silang kasundalohan. Aduna na sila og tanang butang. Anaa na sila sa ilang kaugalingong-yuta; nga, gisulti na ni Jesus, “Tun-i ninyo ang samingay mahitungod sa kahoy’ng higuera.” Atua na sila,

namalik na sa ilang nasud. Niining adlaw natuman na kining Kasulatan, ang mga Judio anaa na sa ilang kaugalingong-yuta.

<sup>148</sup> Niining adlaw natuman na kining Kasulatan, ang Kapanahonan sa Iglesia sa Laodicea.

<sup>149</sup> Niining adlaw kining Kasulatan, ang Mateo 24, natuman na. Ang kalibutan anaa na sa pagkadunot, ang kinatibuk-an niini; ang mga nasud batok sa mga nasud, mga linog sa nagkalainlaing mga dapit, makusog nga mga alimpulos nga nagahaguros, nga ginatay-og ang mga nasud, ug uban pa, mga dagkung hitabong-dautan sa bisan asa na lang. Niining adlaw kining Kasulatan natuman na.

<sup>150</sup> Karon nakita nato ang kahimtang sa kalibutan. Makita nato kon diin ang kasagarang iglesia, kasagarang . . . Organisasyon, denominasyon, makita nato kon asa na kana sila. Makita nato kon asa na ang mga nasud. Ug makita nato nga niining adlaw natuman na kining mga saad.

<sup>151</sup> Karon, apan sa niining adlaw adunay moabot nga usa ka halangdong, Harianong Binhi ni Abraham. Eksaktong ingon niana gayud Kini, usa ka Harianong Pangasaw-onon para sa Harianong, gikasaad nga Anak. Maingon sa ako nang gikasulti kagabii, dili kini mamahimong usa ka natural nga binhi, kondili usa ka espirituwal nga Binhi. Adunay motungha nga espirituwal nga Pangasaw-onon, nga mamahimong Harianong Binhi sa harianong Pagtoo sa Harianong Anak ni Abraham. Magatungha Siya sa esena sa kaulahiang mga adlaw, ug ang panahon ug ang dapit usa ka saad nga gihatag na Kaniya.

<sup>152</sup> Sumala sa Malaquias 4, sa usa ka Kasulatan, adunay motungha nga usa ka Mensahe nga magauyog sa mga kasingkasing sa mga tawo pabalik mismo sa apostolikanhong mga amahan. Adunay usa nga motungha sa esena, sa gahum ni Elias, nga motungha sa esena; usa ka tawong lasangnon nga mogawas, ug aduna siya'y Mensahe nga motakdo gayud pabalik mismo ngadto sa Pulong. Mao na kana ang panahon nga atong ginapuy-an.

<sup>153</sup> Kung ingon-ana, palandunga n'yo karon, hangyoon ko kamo niining taknaa, kamong mga tawo nga taga dinhi sa Jeffersonville. Niadtong 1933, mikunsad ang supernatural nga Kahayag didto sa suba, niadto nga adlaw sa diha nga ginabautismohan ko ang lima ka gatus ka tawo sa Ngalan ni Jesus Cristo, ingon nga ako'y mga baynte-anyos pa lang nga batan-ong lalaki kaniadto. Unsa ma'y gisulti Niini, Jeffersonville? Unsa man Kadtong anaa mismo didto sa Spring Street, sa diha nga ang *Courier Journal*, nagtoo ko nga ang *Louisville Herald* kadto, ang nagmantala sa artikulo mahitungod Niini? Miabot dayon kadto sa Associated Press, ngadto sa Canada. Gigunting kadto ni Doktor Lee Vayle gikan sa maong mantalaan, didto sa Canada, niadtong 1933.



154 Sa dihang ginabautismohan ko na ang ikadise-siete nga tawo, sa ilalum niini nga Kapanghimatuoran; ug kabalo na man mo sa uban pa nga bahin sa estorya. Ug sa pagtindog ko didto, nga ginabautismohan na ang ikadise-siete nga tawo, usa ka Kahayag ang mikunsad gikan sa Langit, nga nagasidlak gikan didto sa ibabaw, nga mora'g usa ka Bitoon nga nagapaubos gikan sa Langit. Usa ka Tingong ang miingon, "Maingon nga si Juan Bautista gipadala aron sa pag-andam sa unang pag-abot ni Cristo, ang imong Mensahe mao ang magauga sa Iyang ikaduhang Pag-abot, sa tibuok kalibutan." Niining adlaw natuman kining Kasulatan.

155 [Nagakalipay ang kongregasyon—Ed.] Niining adlaw! [Nagakalipay og ayo ang kongregasyon ug nagadayeg sa Dios.] Gisaad kini sa Dios. Unsa ma'y nahitabo? Niining adlaw mikaylap Kini sa tibuok sa kalibutan.

156 Ug sa dihang minaug ang Dios didto ug gisulti kadto, niadtong bata pa ako, sa nagadilaab nga sapinit, o usa ka sapinit, nga nagadilaab tungod sa usa ka Haligi nga Kalayo, dinhi dapit sa Wathen sa Utica Pike; samtang nagasag-ob ko og tubig kaniadto, gikan sa kamalig paingon ngadto sa ilegal nga gamanan og ilimno'ng makahubog, kabalo na mo sa kamatuoran bahin niana. Ang ingon Niya, "Ayaw gayud pagpanigarilyo, o mag-inom man og makahubog, o hugawan ang imong lawas, kay adunay buluhaton nga imong pagabuhaton pagmodaku ka na." Akong ginasaksi kaninyo nga Tinuod kana, nga nakita ko gayud Kini. Ug ang Dios, maingon sa gibuhat Niya kang Moises kaniadto, misulti sa atubangan sa kongregasyon didto, ug miingon, "Kini mao ang Kamatuoran."

Niining adlaw natuman kining Kasulatan sa taliwala nato.

157 Matikdi kung unsay gisulti Niya mahitungod sa espirituwal nga pagpang-ila, ug kung sa unsang paagi kini mahitabo; gikan sa pagpandong og mga kamot nganha sa mga tawo, hangtud sa paghibalo sa tinago sa kasingkasing. Niining adlaw natuman kining Kasulatan sa atong atubangan mismo.

158 Kining mga saad nga gihimo, matikdi, kining tanan nga mga saad gipanghimatud-an ug gituman kini sa Dios nga nagasaad. Tan-awa n'yo, nakasab-it didto sa Washington, DC, karong gabhiona, ang retrato sa Manulonda sa Ginoo!

159 Sa dihang si George J. Lacy, ang pangulo sa FBI para sa pagsusi sa fingerprint ug dokumento sa gobyerno sa Estados Unidos, gisusi Kini gikan sa Houston, Texas, ug miingon, "Mao lang kini ang bugtong supernatural nga Persona nga nakuhaan og retrato sukad-sukad sa tibuok kalibutan." Nasayod gayud siya; tungod siya man ang pinakamaayo sa tibuok kalibutan, para niana.

160 Himatikdi, nakasab-it Kini didto, ingon nga Kamatuoran, ang mao ra nga Haliging Kalayo nga nanguna sa Israel sa

kamingawan kaniadto. Nagapanguna Kini karong panahona, sa mao gihapon nga matang sa Mensahe, nga, “Panggawas kamo gikan sa Egipto!” . . . ? . . . Niining adlaw natuman kining Kasulatan. Nasayod na mo sa Mensahe nga Iyang gisulti.

<sup>161</sup> Matikdi pud ninyo ang panan-awon mahitungod sa Tucson, tulo na ka tuig ang milabay, niadtong nagatindog ko didto sa dalan. Niadtong, lima ka tuig sa wala pa kadto, miingon Siya, “Sa adlaw nga magbugsok og mohon ang siyudad sa atubangan nianang ganghaan, umadto ka na sa Kasadpan.” Ang mga kaigsoonan ko sa tabernakulo nga ania dinhi, nasayod gyud niana nga prop- . . . niadtong—niadtong panahona. Husto kana.

<sup>162</sup> Ug niadtong adlaw nga atua na sila ug si Mr. Goynes didto, ug gibugsok kadtong mohon, miingon ko sa akong asawa, “Aduna gyu’y butang bahin niini.”

Ingon niya, “Unsa man kana?”

Ug misulod ko ug gitan-aw ang akong gamay’ng libro. Atua kini.

<sup>163</sup> Ug pagkasunod nga buntag, sa alas diyas, atua ako sulod, sa akong kuwarto didto, mga alas diyas, mikanaug ang Manulonda sa Ginoo. Ingon Siya, “Umadto ka sa Tucson. Mamaatua ka sa amihanang-sidlakan sa Tucson, ug adunay moabot nga pito ka Manulonda nga nag-panon nga magatay-og sa tibuok yuta sa imong palibot.” Ug miingon, “Igasulti ra kini kanimo didtoa.”

<sup>164</sup> Pila man ang nakahinumdom niana, dinhi, sa wala pa kadto mahitabo? [Nagaingon ang kongregasyon, “Amen.”—Ed.] Aniyay mga kalalaken-an nga nagalingkod dinhi mismo niining bilding karong gabhiona, nga atua mismo didto sa dihang nahitabo kadto.

<sup>165</sup> Ug miingon, “Ang Pito ka Selyo sa tinago nga mga misteryo sa tibuok Biblia pagaablihan na, ug matuman na ang Pinadayag 10, nga sa Mensahe sa ikapitong Manulonda mahitabo kining mga butanga.” Niining adlaw natuman na kining Kasulatan sa atubangan nato mismo. Niining adlaw natuman na kining Kasulatan.

<sup>166</sup> Sa miaging tuig, atua kami sa mao gihapon nga dapit, ako ug si Mr. Wood, mitungas sa maong bungtod, nga medyo nagmasulob-on, tungod sa iyang asawa nga may sakit kaniadto. Miingon ang Balaang Espiritu, “Pagpudyot og usa ka bato nga anaa dinha. Iitsa kini sa hangin. Pagmahulog na kini, moingon ka, ‘MAO KINI ANG GINAINGON SA GINOO, adunay paghukom nga mohampak sa yuta.’ Sultihi siya nga makita niya ang kamot sa Dios, sa mosunod nga mga pila ka oras.”

<sup>167</sup> Gisultihan ko si Mr. Wood; nga ania karong gabhiona. Ug, siguro, walo o napulo sa mga kalalaken-an, o kinse, ang atua didto niadtong higayona sa dihang nahitabo kadto; pagkasunod nga buntag, minaog ang Ginoo diha sa usa ka alimpulos ug

nasiak ang bukid sa palibot namo, ug naputol ang tumoy sa mga kahoy, ug naghimo og tulo ka pagbuto, ug miingon, “Paingon na ang paghukom sa Kasadpang Kabaybayonan.”

<sup>168</sup> Duha ka adlaw human niadto, halos maunlod ang Alaska sa ilalum sa yuta. Ug sukad niadto, nagabuga sa maong tibuok Baybayon, ang paghukom sa Dios batok niadtong espirituwal nga tabil. Adunay puthaw nga tabil, adunay kawayan nga tabil, ug aduna usab og sala nga tabil.

<sup>169</sup> Ngani mibiyahé ang sibilisasyon uban sa adlaw; mao usab ang Maayong Balita. Naggikan sila sa sidlakan ug mipaingon sa kasadpan, sama sa pagtuyok sa adlaw. Ug karon anaa na Kini sa West Coast. Dili na Kini magpadayon pa; kung magpadayon man Kini, mobalik na Kini sa sidlakan pag-usab.

<sup>170</sup> Miingon ang propeta, “Adunay moabot nga adlaw nga dili mahimong tawgon nga adlaw o gabii man,” usa ka makilumkilumon nga adlaw, maulan ug daghang yamog, igo lang nga mahibaloan kung unsaon pagpamiyembro sa usa ka iglesia o isulat ang imong ngalan sa usa ka libro. “Apan motungha ang Kahayag sa panahon sa kagabhion.” Niining adlaw natuman kining Kasulatan.

<sup>171</sup> Ang mao ra—ang mao ra nga s-u-n [adlaw—Ed.] nga nagasubang sa sidlakan mao sa gihapon nga s-u-n [adlaw—Ed.] nga nagasalop sa kasadpan. Ug ang mao ra nga S-o-n [Anak—Ed.] nga miabot sa sidlakan ug gipanghimatud-an ang Iyang Kaugalingon ingon nga mao ang Dios nga nadayag sa unod, ang mao ra sa gihapon nga S-o-n [Anak—Ed.] sa Dios ang ania sa kasadpan nga bahin sa kalibutan, nga ginapaila ang Iyang Kaugalingon sa taliwala sa iglesia karong gabhiona, ang mao sa gihapon kagahapon, karon, ug hangtud sa kahangturan. Ang pang-gabii nga Kahayag sa Anak miabot na. Niining adlaw natuman kining Kasulatan sa atubangan nato.

<sup>172</sup> Hain na ba kita sa niining Abrahamnon nga kapanahonan? Hain na man kita niining makuyaw nga panahon nga atong gikahimutangan, ang makuyaw nga takna nga atong gikinabuhian? Ang tanang mga panan-awon natuman na.

<sup>173</sup> Unsa man usab kaniadtong ang usa ka higalang ministro nato dinhi, sa usa ka kauban nga iglesia, nga si Junior Jackson, miadto kanamo usa ka gabii niadto, nga atua ako. Miingon, “Aduna ko og—og damgo, Igsoong Branham, nga nagpabalaka kanako. Nakita ko ang tanang mga kaigsoonan nga nagkatigum ibabaw sa usa ka bungtod.” Ug miingon, “Ibabaw niining bungtod, gitudloan mo kono kami gikan sa mga letra nga gisulat, nga mora’g, sa pipila niadtong mga letra gikulit niadtong panahon didto sa bato. Sa nahuman na nimo kadto, nahuman na ang tanan niadto, giingnan mo kami, miingon, ‘Pagpaduol pa kamo,’ ug nangduol kaming tanan.”

174 Miingon, “May gikab-ot ka sa kung asa man ug, daw sa, mikuha ka og bara ug gibunalan ang ibabaw niining gamay’ng piramide aron maabli. Ug, sa naabli na kini,” miingon, “may batong bantilis nga walay nakasulat niini. Ug gisultihan mo kami nga ‘tan-awon kini.’ Ug kamong tanan. . . Kaming tanan misugod sa pagtan-aw.” Miingon, “Milingi ako, ug namatikdan ko nga mipaingon ka sa kasadpan, kutob sa imong mahimo, paingon sa salopanan sa adlaw.” Pila ba ang nakahinumdom niana? [Nagaingon ang kongregasyon, “Amen.”—Ed.]

175 Ug mitindog ko didto sa makadiyut hangtud nga gipadayag kadto sa Balaang Espiritu. Ingon ko, “Ang tibuok Biblia, sama sa mga gikapadayag na ngadto sa tawo, gikan sa pagpamatarung, pagpabalaan, ang bautismo sa Espiritu Santo, ang bautismo sa Ngalan ni Jesus, ug kining tanang mga butang, gikapadayag na; apan aduna pa’y mga tinago nga gililong sa sulod, tungod kay ang Biblia naselyohan man og Pito ka Selyo. Kinahanglan kong moadto didto aron hibaloon kini.”

176 Niadtong buntag sa dihang mikanaug ang pito ka Manulonda ug gipabuto ang yuta, ug nanglupad ang mga bato sa bisan asa, atua didto ang pito ka Manulonda ug miingon, “Balik ngadto sa Jeffersonville, kon diin ka nagagikan, kay ang Pito ka Selyo sa pito ka misteryo pagaablihan na.”

177 Ania kita, karon, nga nasabtan na ang *Binhi sa Serpente*. Sulod sa pila ka adlaw, kon itugot sa Dios, masabtan nato ang pagkahusto sa *Kaminyoon Ug Panagbulag*. Ug ang tanan niining mga butang nga giablihan sa Dios, ang matag Selyo, ang mga misteryo sukad pa sa pagkatukod sa kalibutan. Ug nangalipay gayud kita, sa Presensiya sa Iyang mga panalangin! Tinuod kana. Niining adlaw, kini ang Kasulatan!

178 Nagmantala ang *Life* magazine og usa ka artikulo mahitungod niini, “Misteryosong lingin nga Kahayag ang mipaitaas didto sa Tucson ug Phoenix,” mao mismo sa gisulti ko na kaninyo halos usa ka tuig sa wala pa kadto mahitabo, kung unsaon pagkahitabo niadto, ug nga mamahimong sama sa usa ka triyanggulo. Nakasab-it ang maong retrato sa simbahan didto. Kamo nga nakapalit niana nga magasin aduna mo niana. Atua kini, nga eksakto gayud. Miingon sila, “Baynte-siete ka milya ang kahabogon niini ug traynta ka milya ang kalapdon.” Wala gihapon nila masabti kung unsa ang nahitabo. Mitungha Kini nga ingon ka misteryoso ug nahanaw ra pud nga ingon ka misteryoso.

179 Si Igsoong Fred Sothmann, si Igsoong Gene Norman ug ako, ang nagatindog didto. Ang tulo usa man ka pagpamatuod. Sama niadtong Iyang gidala sa ibabaw sa bukid; si Pedro, si Santiago, ug si Juan, aron magpamatuod. Atua kami didto ug nagtan-aw niadto sa dihang nahitabo kadto, ug nakita nga nahitabo kadto.

180 Atua Kini, nga nagalutaw sa kawanangan; ingon ka habog, nga wala na'y kaumog, wala na'y yamog ni bisan unsa aron mamahimo nga—nga panganod. Giunsa kaha pagtungha niini didto? Mao kadto ang mga Manulonda sa Dios nga nagabalik na, human sa ilang Mensahe. Niining adlaw ang maong propesiya natuman na sa atong taliwala. Niining adlaw natuman na kining Kasulatan.

181 Matikdi, naablihan na ang Pito ka Selyo. Ang alimpulos paingon na sa Kasadpang Kabaybayonan. Karon, ayaw n'yo kini pakyasa, sama sa gibuhath nila kaniadto.

182 Karon, ang atong pagtagad, mas isentro pa nato sa atong panahon. Unsa ma'y ginaingon sa Kasulatan mahitungod sa karon nga panahon, ug mahitungod sa panahon nga atong gikinabuhian? Nagaingon si Jesus...wala na ko'y oras aron hisgotan kanang tanan, apan gusto ko lang hisgotan kining usa sa dili pa kita matapos.

183 Miingon si Jesus, diha sa San Lucas sa ika-17 nga kapitulo, sa ika-30 nga bersekulo. Si Jesus Cristo, ang Pulong Mismo! Nagatoo ba mo niana? [Nagaingon ang kongregasyon, "Amen."—Ed.] Si Jesus Cristo, ang Pulong Mismo, nga nahimong unod, nagpahayag ug nagsulti kung unsa ang mamahitabo sa Pulong sa katapusang panahon, kung unsa ang ilhanan sa katapusan sa kalibutan. Gisultihan Niya sila kaniadto nga magkagiyera ang nasud batok sa nasud, apan miingon Siya, "Maingon sa nahitabo kaniadto sa mga adlaw sa Sodoma, mao man usab ang mahitabo sa adlaw sa diha nga ginapadayag na ang Anak sa tawo."

184 Karon, kaniadtong mianhi si Jesus sa yuta, mianhi Siya sa ngalan sa tulo ka Anak. Anak sa tawo, nga usa ka propeta; Anak sa Dios; ug Anak ni David.

185 Bueno, sa nagpuyo Siya dinhi sa yuta. Wala gayud Siya miingon nga Siya Anak sa Dios. Ang ingon Niya, "Ako mao ang Anak sa tawo." Gitawag ni Jehovah Mismo si Ezekiel ug ang mga propeta nga, "Anak sa tawo." Tungod kay, kinahanglan man Niyang moanhi aron tumanon ang Kasulatan ingon nga usa ka propeta. Miingon si Moises, "Ang Ginoo nga inyong Dios magpatindog og usa ka Propeta nga sama kanako." Mao kana'y hinungdan nga dili Siya mamahimong Anak sa Dios kaniadto, tungod kay Siya man mao ang Anak sa tawo. Siya... "Miabot ang Pulong ngadto sa mga propeta." Ug Siya mao ang Pulong sa kahupnganan Niini. Ang Anak sa tawo, ang—ang medyor nga propeta... Dili ang medyor nga propeta, kondili ang Dios-nga-Propeta, "Diha Kaniya sa pagkalawas ang bug-os kinatibuk-an sa Pagka-Dios." Busa, Siya mao ang Anak sa tawo.

186 Karon, sulod sa duha ka libo ka tuig, giila nato Siya ingon nga Anak sa Dios, Espiritu.

187 Ug diha sa Milenyum, Siya’y mamahimong Anak ni David, ingon nga Siya anaa na sa Trono. Nasayod kitang tanan niana, nga mga nagatoo sa mga Kasulatan.

188 Bueno, miingon si Jesus, sa katapusan mismo niining kapanahonan sa iglesia nga atong gikinabuhian, nga, “Ang Anak sa tawo igapadayag pag-usab sa mao ra nga paagi kaniadto, maingon sa nahitabo didto sa Sodoma.”

189 Matikdi kung giunsa, Niya pagpahayag kini, sumala sa kasaysayan. Miingon Siya, “Maingon sa nahitabo kaniadto sa mga adlaw,” una, “ni Noe, kung unsa nga nanagpangaon sila, nanag-inom, nanagpangasawa, nanagpamana.” Dayon naghigot na Siya, pagkasunod, sa katapusan, ngadto sa Anak sa tawo, didto sa Sodoma. Tungod, dinha nagahigot pa man Siya bahin sa mga Judio; dinhi, nga sa Sodoma na, nagahigot na Siya bahin sa mga Gentil. Kaniadto, gipanglunod Niya silang tanan pinaagi og lunop, diha sa paghukom; dinhi, nga sa mga Gentil na, gipangsunog Niya silang tanan didto sa adlaw sa Sodoma. Husto kana. Gisunog kaniadto ang kalibutan sa Gentil, “ug mao man usab ang mahitabo sa diha nga ginapadayag na ang Anak sa tawo.” Dili na kini tubig, kondili kalayo na kini niining panahona. Mibasa si Jesus gikan sa mao gihapong Genesis 23 kon diin usab kita mibasa, sa dihang nagbasa Siya mahitungod sa Sodoma.

190 Karon, ginaangkon nato nga tinuod ang maong mga kahintang nga gisulti ko, mahitungod sa kalibutanong kahintang sa Sodoma, sa mga Sodomahon, ang Sodomahon nga kahintang. Kitang, tanan, moingon gyud og “amen” niana. Nagatoo kita niana. Oo.

191 Ug ang espirituwal nga kahintang sa Laodicea, ang iglesiang natural, moingon sab kita og “amen” niana, ug dawaton ang mga ilhanan niini. Nasayod kita nga anaa na ang tanang ilhanan. Ang iglesia anaa na sa Laodicea. Nasayod kita niana. [Nagaingon ang kongregasyon, “Amen.”—Ed.]

192 Nasayod kita nga ang kalibutan anaa na sa Sodomahon nga kahintang. Husto ba kana? [Nagaingon ang kongregasyon, “Amen.”—Ed.] Dawaton nato kana.

193 Apan unsa man usab ang mahitungod sa ilhanan para kang Abraham, nga nagahulat alang sa gikasaad nga anak? Lahi pud kini.

194 Hinumdumi, nga aduna sila og usa ka Sodoma kaniadto; aduna sila’y mensahero. Ug si Abraham aduna pud og Mensahero para kaniya.

195 Nagahulat kaniadto si Abraham, sa matag adlaw, para sa, halos imposible na gyud nga butang nga mahitabo. “Si Sarah, nga nubenta na, ug siya nga usa na ka gatus.” Tungod sa saad

sa Dios, nagahulat gihapon siya. Taliwala sa tanang kritisismo, nagahulat gayud siya alang niadto nga anak.

<sup>196</sup> Mao usab ang tinuod nga magtotoo nga nagahulat gihapon alang sa pagbalik sa gikasaad nga Anak! Matikdi, sa wala pa miabot ang maong anak, aduna 'usa og ilhanan nga gikahatag kaniya. Dili ba ang ilhanan mahitungod sa moabot nga Anak nga igapadayag ngadto sa harianong Binhi ni Abraham nga nagahulat alang sa Harianong Anak, pareho ra sa kang amahang Abraham kaniadto nga nagahulat usab alang sa natural nga anak? [Nagaingon ang kongregasyon, "Amen."—Ed.] Husto ba kana? ["Amen."] Mao kana ang giingon ni Jesus, dinhi sa San Lucas 17:30, "Nga sa dili pa moabot kini nga panahon, kanang, ang Anak sa tawo igapadayag sama sa gibuhat Niya sa mga adlaw sa Sodoma, sa wala pa ang paglaglag sa Sodoma." Karon nagahulat kita og usa ka ilhanan.

<sup>197</sup> Karon hisgotan ta ang mga kahimtang sa panahon nga sama kaniadto sa Sodoma. Matikdi, bug-os na sila nga nangahimong Sodomanhon, ang kalibutan.

<sup>198</sup> Siguro usa kadto sa mga tighimo og pelikula ang naghimo og salida, dili pa lang dugay, ug nakakita ko niadto, kadto mao ang, *Sodoma*. Kung makatan-aw mo niana ug hinoon wala ma'y laing ginapasalida kondili kana ra, tan-awa gani ninyo kana. Sa tinuod lang usa kana ka maayo nga salida mahitungod sa Estados Unidos karong panahona, sa Hollywood, eksakto gayud; mao ra nga matang sa pagpangbisti ug tanang uban pa nga aduna sila niadtong panahon; mga dagkung balay-imnahan ug tanan na, usa ka relihiyoso nga grupo sa mga tawo, mga relihiyoso kono.

<sup>199</sup> Matikdi, nga adunay saksi ang Sodoma kaniadto, ug usa kadto ka tawo nga ginganlan og Lot, nga pag-umangkon lang ni—ni Abraham.

<sup>200</sup> Bueno, wala niadto si Abraham sa Sodoma, siya ug ang iyang pundok. Aduna siya'y dakung pundok uban kaniya, nga igo na para makiggubat sa halos usa ka dosena nga mga hari ug mga kasundalohan niini. Busa, aduna siya'y dakung grupo uban kaniya. Ug naglingkod siya didto ilalum sa kahoy'ng encina, usa ka adlaw niadto, sa diha nga ang tanan dili na maayo para kaniya; wala na'y si kinsa man nga makighilambigit kaniya, apan gikuptan niya sa gihapon kadto nga saad.

Matikdi n'yo og ayo, karon, sa dili pa kita matapos.

<sup>201</sup> Samtang nagalingkod siya didto, may miabot nga tulo ka lalaki, nga miduol paingon kaniya. Duha kanila ang niadto sa Sodoma ug giwali ang Maayong Balita ngadto kanila, aron manggula na, niadto kang Lot. Husto ba kana? [Nagaingon ang kongregasyon, "Amen."—Ed.] Apan ang Usa nagpabilin kang Abraham. Matikdi, ang Usa nga nagpabilin uban ni Abraham

mao ang Dios Mismo. Ang maong duha mao'y mga mensahero nga Manulonda.

<sup>202</sup> Bueno, didto sa Sodoma, wala sila namuhat og mga milagro, kondili gibutahan lang ang mga tawo. Ug ang pagwali sa Maayong Balita kanunay nga nagapabuta sa mga tawo.

<sup>203</sup> Karon matikdi n'yo ang kahimtang niadto nga panahon. Adunay iglesiang natural. Kanunay nang sa tutulo, nga girepresentar ang Dios, sa gikaingon ko na kagabii. Atua ang mga Sodomanhon; ang mga iya ni Lot; ug ang mga iya ni Abraham. Anaa usab kini sa mao ra nga kahimtang karong gabhiona, ingon niana gayud ang kahimtang karon sa kalibutan.

<sup>204</sup> Tugoti kong hangyoon kamo og usa ka butang. Matikdi n'yo kini nga eksena karon. Gitawag ni Abraham kining Lalaki nga nakig-estorya kaniya nga, "Elohim." Ang Hebreohanong pulong nga *Elohim* nagakahulogan "ang Maong may-kasarang-sa-tanan, ang Maong Eternal," si Elohim, ang Dios Mismo!

<sup>205</sup> Sa sinugdan, ang Genesis 1, miingon, "Sa sinugdan ang Dios . . ." Gamita ang Hebreohanong pulong dinha, o, kaha ang Griyegong pulong, diay, "Sa sinugdan gibuhat ni *Elohim* ang mga langit ug yuta."

<sup>206</sup> Ania, Siya, sa Genesis, sa mga ika-22 dinhi, miingon Siya pag-usab, o—o sa mga ika-20, miingon Siya, ug gitawag niya ang ngalan niining Lalaki nga "Elohim." Nganong gitawag man niya og ingon niana? Tungod ang Dios kadto, nga girepresentar diha sa tawhanong lawas, nga milingkod kauban ni Abraham ug mikaon og tinapay nga may palaman nga karne sa usa ka nating baka, miinom og gatas, ug mikaon og pipila ka tinapay. Ang Dios Mismo, ug nawala ra dayon sa atubangan ni Abraham.

<sup>207</sup> Apan gihatagan Niya siya og usa ka ilhanan. Matikdi. Ug ang maong ilhanan mao kadtong mitalikod Siya sa balongbalong.

<sup>208</sup> Ug hinumdumi, si Abraham, *Abram* pa ang iyang ngalan pila ka mga adlaw sa wala pa kadto, ug Sarra pa si Sarah sa wala pa kadto; S-a-r-r-a pagkahuman S-a-r-a-h na, ug A-b-r-a-m ngadto sa A-b-r-a-h-a-m. Ang *Abraham* nagakahulogan man og "amahan sa mga kanasuran."

<sup>209</sup> Karon matikdi n'yo pag-ayo dinhi, ug makita nato ang kahimtang sa panahon nga atong gikinabuhian karon, sama sa gisulti ni Jesus kanato nga lauman nato ang ingon-ini nga kahimtang. Nakita na nato ang tanang uban pa niini nga mao gayud; karon tan-awon sab nato diha sa harianong Binhi, kung unsa ba nga kahimtang ang angay nilang makita.

<sup>210</sup> Karon miingon kining Lalaki, "Abraham, asa ba ang imong asawa, nga si Sarah?"

Ug miingon si Abraham, "Anaa siya sulod sa balongbalong, sa likod Mo."



211 Bueno, wala pa gayud Niya siya makita sukad-sukad. Giunsa man Niya pagpakahibalo nga ang iyang ngalan mao si *Abraham*? Giunsa man Niya pagpakahibalo nga ang iyang ngalan mao si *S-a-r-a-h*? “Abraham, asa ba ang imong asawa, nga si Sarah?”

Miingon, “Anaa siya sulod sa balongbalong, sa likod Mo.”

212 Miingon Siya, “Ako . . .” “Ako,” usa ka personal nga puli-ngalan. “Pagaduawon Ko ikaw sumala sa saad. Ang imong asawa makaangkon niana nga anak. Misalig man ka Kanako, karon himoon Ko kini nga mamahitabo.”

213 Ug si Sarah, nga anaa sulod sa balongbalong, sa likod, hilum nga naminaw o naminaw sa tago, kung unsa man ang tawag n’yo niana, sa pagpaminaw niya didto sa balongbalong, mikatawa siya nga hilum, ug miingon siya, “Karon, ako, ang usa ka tigulang na nga babaye sama nako, magkaaduna pa ba og kalipay sa akong ginoo; ug siya nga tigulang na, usab, nga usa na ka gatus ang pangidaron? Samtang, wala na kini nahitabo sulod sa daghan, daghan nang mga tuig.”

214 Ug ang Lalaki, L-a-l-a-k-i, nga naglingkod didto nga nagakaon, diha sa tawhanong lawas, nagainom ug nagakaon nga sama sa usa ka ordinaryong tawo; nga naabogan ang Iyang bisti, ug naabogan ang Iyang mga tiil, ug gihugasan kadto ni Abraham. Ang Dios, Mismo, mitan-aw sa palibot, ug miingon Siya, “Nganong mikatawa man si Sarah, didto sulod sa balongbalong, nga ginasulti ang *ingon niini*?” Nasayod gyud Siya, og naila ang mga hunahuna ni Sarah sulod sa balongbalong, sa luyo Niya. Husto ba kana? [Nagaingon ang kongregasyon, “Amen.”—Ed.]

215 Karon, kaniadtong mianhi sa yuta ang Harianong Binhi ni Abraham, unsa man nga ilhanan ang Iyang gipakita, ang Anak sa tawo. Miduol si Simon ngadto Kaniya usa niadto ka adlaw; gidala man siya ni Andres. Giingnan Niya, “Ang imong ngalan mao si Simon. Anak ka ni Jonas,” ang ingon Niya. Kita n’yo, nahimo siyang usa na ka magtotoo gumikan niadto.

216 Miadto si Felipe ug gidala si Natanael; sa didto na siya, miingon, “Umari ka, tan-awa ang usa ka Lalaki Nga among—among nakita; si Jesus nga taga-Nazaret, nga anak ni Jose.”

217 Ingon siya, “Karon kadali lang. May maayo bang butang nga mogula gikan niana nga panatissimo?”

Ingon niya, “Ari gani ka, og tan-awa.”

218 Busa sa dihang miduol na si Felipe sa Presensiya ni Jesus, uban si Natanael, mitan-aw si Jesus kaniya ug miingon, “Tan-awa ang usa ka Israelinhon nga kaniya walay limbong.”

Ingon siya, “Rabbi, kanus-a Mo man ako hiilhi?”

219 Miingon, “Sa wala ka pa gitawag ni Felipe, sa didto ka pa ilalum sa kahoy, nakita Ko na ikaw.”

220 Ingon siya, “Rabbi, Ikaw mao ang Anak sa Dios. Ikaw mao ang Hari sa Israel!”

221 Kaniadtong ang luoy’ng babaye didto sa atabay, nga anaa sa iyang pagka-imoral nga kahimtang, miadto, sa usa ka diyutay’ng talan-awon nga mora’g ingon niini, aron magkalos og tubig. Gipalakaw ni Jesus ang Iyang mga tinun-an, aron mopalit og pagkaon. Pag-abot na sa babaye aron magkalos og tubig, miingon Siya, “Hatagi Ako og mainom, babaye.”

222 Ingon ang babaye, “Dili baya nabatasan para Kanimo nga mosulti niana. Aduna man kita’y panaglainlain dinhi. Karon, kamong mga Judio wala mo’y unsa man nga kahilambigitan kanamo nga mga Samarianhon; wala sab kami’y unsa man nga kahilambigitan kaninyo.”

223 Miingon Siya, “Apan, babaye, kung nasayod ka lang kung Kinsa ang imong gikaestorya, mangayo ka gayud Kanako og mainom. Hatagan Ko ikaw og tubig nga dili ka na moanhi pa dinhi arong magkalos.”

224 Hingsayran Niya kung unsay iyang kahimtang, kung unsa kadto. Miingon Siya, “Lakaw ug kuhaa ang imong bana ug balik dinhi.”

Ingon niya, “Wala man ko’y bana.”

225 Miingon Siya, “Tinuod ang imong giingon. Nagkaaduna ka na og lima, ug ang usa nga gikaipon mo karon dili man imong bana.”

226 Ingon niya, “Sir, naila ko nga Ikaw usa ka propeta. Nasayod kami nga pagmoabot na ang maong Mesias ipakita Niya kanamo ang ingon niining mga butang.”

Miingon si Jesus, “Ako mao Siya.”

227 Tungod niadto, midalagan siya sa siyudad ug miingon, “Umari kamo, tan-awa ninyo ang usa ka Tawo Nga nagsulti kanako sa mga butang nga nabuhat ko. Dili ba mao na kini ang mismong Mesias?”

228 Matikdi, gibuhat Niya kadto atubangan sa mga Judio, ug sa mga Samarianhon, apan wala gayud sukad sa mga Gentil. Ang mga Gentil, kita nga mga tawo, mga pagano pa man gud niadtong mga panahona, ngani ang ubang mga kanasuran, nagapas-an pa og bunal sa ilang likod, nanagsimba sa mga dios-dios. Wala kita nagpaabot sa unsa man nga Mesias.

229 Nagapakita lamang Siya alang niadtong mga nagapaabot Kaniya, ug angay gayud kita nga magpaabot Kaniya.

230 Apan kadtong mga nag-angkon nga nagpaabot kono Kaniya, ang iglesia mismo, sa diha nga nakita nilang napamuhat kadto, miingon sila, “Usa Siya ka yawa. Usa Siya ka manghihimalad, usa ka Beelzebub!”

231 Ug miingon si Jesus, “Mapasaylo pa sila niana nga sala,” tungod kay wala pa man Siya namatay kaniadto. “Apan,” miingon, “sa umalabot ang Espiritu Santo moabot ug magbuhat sa mao gihapong butang, ug ang pagsulti’g usa ka pulong batok Niini dili na gayud mapasaylo.” Kini na nga panahon kana, kon diin ang matag Pulong kinahanglan pagabantayan gayud. “Ang pagsulti’g usa ka pulong batok Niini; dili na gayud pagapasayloon niining panahona ni sa umalabot pa nga panahon.”

232 Mao kaniadto ang Harianong Binhi ni Abraham. Ug sa karon kining Harianong Binhi ni Abraham, nga miabot pinaagi nianang pagpaila sa Lalaki nga nagalingkod kaniadto uban ni Abraham, nagapamatuod nga mao ra kini sa gihapon nga Dios, nga nagasaad sa niining panahon, “Maingon sa nahitabo kaniadto sa mga adlaw sa Sodoma, mao man usab ang mahitabo sa pag-abot sa Anak sa tawo, sa diha nga ginapadayag na Niya ang Iyang Kaugalingon ingon nga Anak sa tawo.” Amen. Mao na kini ang panahon nga matuman kining Kasulatan.

233 Tan-awa n’yo ang kahintang nga atong nahimutangan sa karong panahon. Tan-awa n’yo ang iglesia kon diin ang Anak sa Dios. . . Tan-awa n’yo ang makilumkilum nga adlaw. Tan-awa ang tanang mga propesiya. Karon, usa ka talagsaon nga butang, kung ingon niana miabot na pud diay ang atong mga bisita, kung ang kahintang siguradong sama na kaniadto sa Sodoma.

234 Tulo sila nga miabot, tulo ka dungganong mga lalaki nga gipadala gikan sa Langit. Angkonon natong tinuod kana. Tulo sila; ang Usa nagpabilin ra uban ni Abraham. Miabot silang tanan didto, apan ang Usa nagpabilin kang Abraham. Ang uban ra kanila ang miadto sa Sodoma. Husto ba kana? [Nagaingon ang kongregasyon, “Amen.”—Ed.] Ug giusab ang ngalan ni Abraham, gikan sa Abram ngadto sa Abraham. Tinuod ba? [“Amen.”]

235 Wala ni usa ka higayon sa kasaysayan, nga ang iglesia sa kalibutan, nagkaaduna og usa ka ebanghelista sukad nga nagsangyaw, nga ang ngalan naghinapog og h-a-a-m, hangtud niining adlaw, Billy G-r-a-h-a-m. Husto ba kana? [Nagaingon ang kongregasyon, “Amen.”—Ed.] G-r-a-h-a-m, unom ka letra. Ang A-b-r-a-h-a-m pito ka letra. Apan ang G-r-a-h-a-m unom ka letra, nga para sa kalibutan, sa tawo. Kita n’yo?

236 Tan-awa n’yo kung kinsa ang nagsangyaw dinha, karong panahona, sila mao ang mga mensahero nga gikan sa Langit.

237 Aduna ba’y tawo sa kalibutan nga nagwali gayud og paghinulsol sa ingon ka tataw nga sama ni Billy Graham? Aduna na ba’y tawo nga may epekto sa mga tawo, nga sama ni Billy Graham? Wala pa gayud sukad, og usa ka tawo, sa tibuok kalibutan. Oh, si Billy Sunday, ug uban pa, ania ra sa Estados Unidos, apan si Billy Graham ilado gayud sa tibuok kalibutan. Kita n’yo kon diin siya nagapanawag? Didto sa Sodoma.

238 Ug aduna pud siya'y kauban nga tawo dinha sa iglesiang Pentecostal, usa ka Oral Roberts.

239 Apan unsa man usab ang pundok sa mga Pinili? Unsa man nga matang sa ilhanan ang angay nila nga makita? Unsa man ang angay nila nga mabatonan? Alleluyah! "Sa panahon sa kagabhion motungha ang Kahayag." Karong adlaw natuman na kining Kasulatan. [Nagakalipay ang kongregasyon—Ed.] Karong adlaw natuman na ang saad sa Dios. Nasayod kita niana nga mao ang Kamatuoran. Ania mismo Siya karong gabhiona maingon sa kung unsa unsa Siya kaniadto.

240 Karon, ang pagwali niini, nga gisulti ko kaganina, kung magwali ka og unsa man ug kana'y ang Ebanghelyong Kamatuoran, nan obligado gyud ang Dios nga panghimatud-an kana. Tinuod ba kana? [Nagaingon ang kongregasyon, "Amen."—Ed.] Karon, kung ingon niana man, tugoti ang Dios nga misulat sa Pulong, tugoti ang Dios nga nagproposiya, tugoti ang Dios nga mao ang Dios sa Pulong, nga motungha ug magpamatuod nga Siya'y Dios sa gihapon.

241 Kaniadtong misaka si Elias sa bukid; gitan-aw siya, miadto si Eliseo aron tan-awon si Elias, ingon siya, "Gusto ko og doble nga bahin." Ug nahulog kang Eliseo ang kupo nga atua kang Elias. Mikanaug siya, ug gipilo kadtong kupo ug gihampak ang suba, ug miingon, "Hain man ang Dios ni Elias?" Ug ang mao rang butang nga nahitabo para kang Elias, nahitabo usab para kang Eliseo.

242 Ug ang mao gihapon nga Ebanghelyo, ang mao gihapon nga Gahum, ang mao gihapon nga Anak sa tawo nga mao ra kagahapon, mao gihapon sa karon, ug hangtud sa kahangturan. Mga Hebreohanon 13:8. Nagatoo ba mo Niini? [Nagaingon ang kongregasyon, "Amen."—Ed.] Kung ingon-ana, hangyoon ko kamo. Dili ako mamahimong Siya, apan ania Siya. ["Amen."] Tigdala lamang kita.

243 Ang uban kaninyo nga mga tawo dinha, nga adunay sakit ug nagaantus, ingon nga nasayod kamo nga wala ako makaila kaninyo, tugoti ang Dios karon. . . kung mapaubos ko gayud ang akong kaugalingon. Pag-ampo mo ug hangyoa ang Dios.

244 Wala siguro'y. . . Wala ma'y prayer kard sa bilding, di ba? Wala, wala ako. . . Wala kami nakapanghatag og mga prayer kard. Magpahigayon ra kami og panagtigum sa pag-ampo didto sa. . . o pagpang-ayo sa mga may sakit, didto sa iglesia. Apan, pag-ampo mo.

245 Ug nasayod kamo nga usa gayud ako ka estranyo kaninyo. Kita n'yo, kaila na man mo kanako, mga taga-Jeffersonville! Ayaw ko nga ang mga taga-Jeffersonville ang moapil niana. Gusto ko og mga tawo nga gikan pa sa halayo sa kung asa man. Hibaloa ninyo kung nagapadayag ba gihapon ang Dios!

Hibaloa ninyo kung Siya mao ba sa gihapon kagahapon, karon, ug hangtud sa kahangturan!

<sup>246</sup> Buhata n'yo ang sama sa gibuhat sa luoy'ng babaye kaniadto. Milabay Siya, ug miingon ang babaye, "Nagatoo ko niini nga Tawo." Aduna siya'y talinugo, ug miingon siya, "Kung mahikap ko lang unta ang borlas sa Iyang bisti, nagatoo ko nga mamaayo gayud ako." Husto ba kana?

<sup>247</sup> Tungod sa iyang pagtoo, niadtong adlaw, natuman ang Kasulatan. "Iyang ginaayo ang kasingkasing sa mga nagkaguol, giayo ang mga may sakit ug ang mga piang."

<sup>248</sup> Sa nahikap na niya ang Iyang bisti, ug milakaw na ug milingkod, milingi Siya ug miingon, "Kinsa ba'y mihikap Kanako?" Giunsa man Niya pagpakahibalo, sa ingon niadto ka daghang mga tawo, tingali'g traynta ka pilo sa kung unsa ang kadaghanon dinhi karong gabhiona, linibo kanila? Giunsa man Niya pagpakahibalo niadto? Miingon Siya, "Kinsay mihikap Kanako?" Wala Niya gisulti kadto aron lang may maikasulti; gisulti Niya kadto tungod kay tinuod man kadto. Ug miingon Siya, "Kinsay mihikap Kanako?" Ug direktso Siya nga mitanaw sa palibot ug nakita ang luoy'ng babaye, kon diin kini nagalingkod o nagatindog, kung unsa ma'y iyang posisyon, giingnan siya nga mihunong na ang iyang talinugo.

<sup>249</sup> Mao kadto si Jesus kagahapon. Siya gihapon kana sa karon. Nagatoo ba mo niana? [Nagaingon ang kongregasyon, "Amen."—Ed.]

<sup>250</sup> Wala ako makaila kanimo; pero nakaila ang Dios kanimo. Apan aduna ka'y sakit sa imong kilid, nga nagapahasol kanimo. Husto kana. Nagalingkod ka dinha nga nagaampo mahitungod niana. Usa ba ako ka estranyo kanimo, ug dili kita magkaila sa usa'g usa? Tindog ka, kung ingon-ana. Wala ko makaila kanimo. Ang lalaki *kini* nga ania mismo sa suok, kining batan-ong lalaki. Aduna ka usab og problema sa tutunlan. Husto kana. Nagaampo ka mahitungod niana. Ginerbiyos ka pag-ayo mahitungod sa usa ka butang. Gikinahanglan mo nang mobiya sa panagtigum tungod kay, usa ikaw ka ministro, og aduna ka pa'y pipila ka katungdanan nga kinahanglan mong atimanon. Husto kana. Uh-huh. Nagatoo ka ba nga nakaila ang Dios kanimo? Rev. Mr. Smith, karon puede ka nang molakaw ug mamaayo na. Giayo ka na ni Jesus Cristo. Adto na sa imong panagtigum; dili ka na maproblema sa imong tutunlan.

Kinsa ma'y iyang gihikap?

<sup>251</sup> Ania'y usa pud ka lalaki nga nagalingkod *dinhi* mismo; nagaantus siya. Aduna siya'y tumor sa wala niya nga baga. Wala siya. . . Dili siya taga-dinhi. Usa ikaw ka minero kaniadto. Husto kana. Usa gayud ako ka estranyo kanimo. Kung husto kana, iwarawara ang imong kamot. Ang tumor anaa sa imong wala nga baga, ug gikatakda ka na nga maoperahan dayon. Husto

ba kana? Dili ka taga-dinhi. Dili ka taga-dinhi niining lungsod. Taga-Virginia ka. Husto kana. Nagatoo ka ba nga nakaila ang Dios kanimo? Mr. Mitchell, husto kana, pauli na ug mamaayo na. Giayo ka na ni Jesus Cristo. Pangutan-a n'yo ang maong tawo! Wala ko pa gyud siya nakita sukad, sa tibuok kong kinabuhi. Naglingkod ra siya dinha, nga nagaampo.

Niining adlaw kining Kasulatan!

<sup>252</sup> [Mitalikod si Igsoong Branham sa kongregasyon—Ed.] Aniyay usa ka babaye nga nagalingkod dinhi mismo, sa akong luyo, sama ni Sarah kaniadto nga anaa sulod sa balongbalong. Nagaampo siya para usa ka anak nga babaye. Tindog ka. Wala dinhi ang maong anak; atua siya sa halayo, ang anak nga babaye. Ug pareho ka lang sa usa ka babaye kaniadto nga miduol kang Jesus, nga adunay babaye nga gisakit gayud og ayo sa yawa. Ang maong babaye . . . giyawaan ang batang babaye. Wala siya dinhi. Siya'y taga . . . Taga-North Carolina ka. Nagatoo ka ba niana? Ug tinuod kana, dili ba? Mrs. Orders, puede ka nang mouli. Kung motoo ka sa tibuok mong kasingkasing, nan makaplagan mo ang imong anak nga babaye sama kaniadtong miingon si Jesus Cristo, sa nangaging mga panahon, nga naayo na kini.

<sup>253</sup> Niining adlaw kining Kasulatan; ang ilhanan sa Sodoma, ang ilhanan sa super nga Binhi, ang ilhanan sa natural nga iglesia! Niining adlaw natuman kining Kasulatan sa inyong taliwala. Nagatoo ba mo niini? [Nagaingon ang kongregasyon, "Amen."—Ed.]

<sup>254</sup> Dawaton n'yo ba Siya karon mismo ingon nga inyong Manluluwas ug mananambal? Tindog, ang matag usa kaninyo, moingon, "Ginadawat ko ang akong kaayohan. Ginadawat ko Siya ingon nga akong Manluluwas. Ginadawat ko Siya ingon nga akong Hari." Tindog ang matag usa kaninyo.


Niining adlaw! Paminaw, mga higala.

<sup>255</sup> "Gibasa Niya ang Kasulatan, giuli ang Biblia ngadto sa sacerdote, ug," gikaingon nga, "ang tanang mga mata sa mga tawo nanagtutok Kaniya. Ug mitan-aw Siya kanila, ug miingon, 'Karong adlaw natuman kining Kasulatan.'"

<sup>256</sup> Nabasa ko na ang Kasulatan, nga may usa ka dosena o sobra pa nga mga kapanghimatuoran nga nagapuyo na gayud kita sa kaulahiing adlaw, ang henerasyon nga makakita sa pagbalik ni Jesus Cristo sa yuta. Ug ginasulti ko kaninyo karong gabhiona, pag-usab, karong adlaw natuman na kining Kasulatan sa inyong atubangan mismo.

<sup>257</sup> Kamong mga anaa sa Tucson, kamong mga anaa sa California, kamong mga anaa sa New York, kining mga anaa nakakonekta sa telepono, karong adlaw natuman kining Kasulatan sa inyong atubangan.

<sup>258</sup> Managkalipay kita ug managhugyaw, tungod kay ang Kasal sa Cordero haduol na, ug ang Iyang Pangasaw-onon . . . giandam na sa Iyang Pangasaw-onon ang Iyang Kaugalingon.

<sup>259</sup> Ipataas nato ang atong mga kamot ug himayaon Siya, kamong tanan. Panalanginan kamo sa Dios. [Padayon nga nagakalipay ang kongregasyon ug nagadayeg sa Dios—Ed.] 

*KARONG ADLAWA KINING KASULATAN NATUMAN* CEB65-0219  
(This Day This Scripture Is Fulfilled)

Kining Mensahe ni Igsoong William Marrion Branham, unang giwali sa Ingles niadtong Biyernes sa gabii, Pebrero 19, 1965, didto sa Parkview Junior High School sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2020 VGR, ALL RIGHTS RESERVED

**VOICE OF GOD RECORDINGS**  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)



## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)